

Matxoelacarta, Pablo Ielpox, Corinto paklowaxpijiwliajwa

Pablo Ielpox carta Corinto paklowaxpijiwliajwa

1 1-2 Xan, Pablo, Dios namakafit Jesucristo pej-apóstolliajwan. Samata, Dios nato'a jiw naewñajnalijwan Jesús pejwñajan potñajñucha. Ampox carta Ielx, wajkoewan Sóstenes sñapich, xamal Dios pejiwam, Corinto paklowaxpijwamliajwa. Xamal japon pejiwam, Jesucristo tñp xot xamalliajwa. Dios xamal tadut, asew jiw sñapich, japon pejiwaliajwam chiekal duilaliajwam japonliajwakal. Asewbej, taduchpi japon pejiwaliajwa, japi potñajñucha duilpi, kawñajan wajpaklon Jesucristo. Jesucristo paklon puexa xatisliajwa, japi jiwliajwabej. **3** Waj-ax Dios, wajpaklon Jesucristobej, kawñajñax xamal kajachawaesliajwa, chiekal duilaliajwambej, asew jiw sñapich.

Dios kajachawaechpox Corinto paklowaxpijiw, japi Cristo pejiw xot

4 Xan Dios kawñajñax wut, gracias-an Diosliajwa, japon xamal pomatkoicha kajachawaesful xot, Jesucristo pejiwam xot. **5** Xamal Jesucristo pejiwam xot, Dios xamal chiekal kajachawaet. Samata, xamal xajñpam tanbichliajwam Diosliajwa. Chiekal matabijambej Dios pejjamechan jiw chiekal naewñajnalijwam. **6** Ja-am wut, xamal chiekal naexasitam Jesús pejwñajan. **7** Samata, ampamatkoian xamal wñajñawetam wajpaklon Jesucristo pejme pasliajwasik. Xamal Dios kajachawaesaxael chiekal nabichliajwam Diosliajwa. **8** Dios xamal kajachawaesaxael chiekal naexasisfulaliajwam, kaen aton xamal tasalagamata, wajpaklon Jesucristo pejme pask wut. **9** Xanal chiekal matabijax Dios xamal kajachawaetpox, is xoton jumdutpox. Dios xamal tadut japon pejiwaliajwam

duilaliajwam pomatkoicha japonxotse, Dios paxulan suapich, wajpaklon Jesucristo.

**Nasalpox Jesús pejwujajan naexasiti,
kaenejchaxoelaxa-el xoti**

10 Takoew, wajpaklon Jesucristo xan nabuxto'a xot, xamal jum-an kaenejchaxoelaxliajwam, duilam wut. ¡Asalel nabej nasale!
11 Cloé, japow pejjiw, xan nachapaei. Samata, wultaenx xamal kaenejchaxoelaxa-emilpox. Samata, ampox carta lelx xamal naewuajnalijwan. **12** Asew jiw xamalxot jum-aech: “Xanal kaes nejxasinkax Pablo naewuajanpox. Samata, xanal Pablo pejjiwan” —aech japi jiw. Asew jiw xamalxot jum-aechbej: “Xanal kaes nejxasinkax Apolos naewuajanpox. Samata, xanal Apolos pejjiwan” —aechi. Asew jiw xamalxot jum-aechbej: “Xanal kaes nejxasinkax Pedro naewuajanpox. Samata, xanal Pedro pejjiwan” —aech asew jiw. Asew jiw xamalxot jum-aechbej: “Xanal kaes nejxasinkax Cristo naewuajanpox. Samata, xanal Cristo pejjiwan” —aechi.
13 Cristo kaekolan. Japon, me-ama xabich wut, jachi-elon. Samata, xatis Cristo pejjiws xot, nasalaxisal, kaemuch xotlis. Xan, Pablo, cruztat nakimatamatla-el. Xamalxot asew jiw bautisa-esalbej tajjiw nadofaliajwa. Samata, xamal jumchiyaximil xanliajwa: “Xanal Pablo pejjiwan” —chiyaximil. **14-15** Xamalxot jiw xabich bautisa-enil. Asbuan jumch bautisax kolenje. Bautisax Crispo, Gayobej. Samata, xamalxot asew jiw jumchiyaxil xanliajwa: “Pablo xan nabautisa japon pej-aton nadofaliajwan” —chiyaxil japi jiw xanliajwa. Samata, xan nejchachaemlax, jiw japox jumchiyaxil xot. **16** Amwutjel xan nejchafaetx asew kaes bautisaxpi. Bautisaxbej Estéfnas, pejjiw suapich. Jalape. Kaes asew bautisax wut, xan nejkiowxlis. **17** Cristo nato'a-el jiw bautisaliajwan. Japon xan nato'a pejwujajan jiw naewuajnalijwan, japi Dios bu'welijwas. Naewuajnaj wut Cristo pejwujajan, me-ama aton, xabich matabij-san wut, xan jachi-enil. Pe jachiyaxaelen wut, jiw asbuan jumch jumchiyaxael xanliajwa: “Pablo xabich matabijt” —chiyaxaeli. Jachiyaxael wut, naexasisaxili Cristo tuppox cruztat japiliajwa.

**Amxot jum-aechpox Dios pejpamamaxliajwa,
matabijsaxliajwabej**

18 Asew jiw pejbu'wujajan wutfuk, japi tup wut, infierno poxaxaek, naexasis-el xoti Cristo tuppox cruztat japiliajwa.

Cristo pejpaturax japiliajwa, me-ama nejliaklax wut, wejatisipox. Pelax xatis Dios nakbu'weyaxaelpis, chiekal matabijas, Dios nakkajachawaesfulaxaelpox. **19** Dios pejjamechan, chajia lelsopox, jum-aech wut, jum-aech Dios jum-aechpox:

“Jiw xabich matabijapi, japi matabijapoxan xan toesaxaelen. Asamatkoi xan tajaxtat japi jiw chiekal matabijaxael japi matabijapoxan pachaema-elpox, diachwujnakolaxa-el xot” —aechox.

20 Asew jiw ampathatpijiw pajutliajwa jum-aech: “Xanal xabich matabijax” —aechi asew jiw jumtaeliajwas. Asew jiwbej pajutliajwa jum-aech: “Xanal xabich matabijax jiw chanaekabuanalajwan” —aechi asew jiw jumtaeliajwas. Asew jiwbej pajutliajwa jum-aech: “Xanal chiekal matabijax puexa ampathatpijxanliajwa” —aechi asew jiw jumtaeliajwas. Pe Dios jum-aech puexa japi jiwliajwa: “Japi pejmatabijsaxan, nejliaklaxan, pajut nejchaxoelpoxankal xot” —aech Dios japi jiwliajwa. **21** Dios xabich pejmatabijsax. Me-ama ampathatpijiw pejmatabijsax, jachi-el Dios pejmatabijsax. Dios tapae-el japi jiw matabijaliajwa Dios pejmatabijsax. Dios jiw bu'weyaxael, naexasit xoti chimiawujajan, Cristo turpox cruztat japiliajwa. Pe nakiowa, asew jiwliajwa Jesús pejwujajan, me-ama nejliaklaxwujajan wut, wejatisipox.

22 Xan naewujanax wut judíos, japi xabich taesia koechaxan naexasisliajwa xan naewujanaxpoxan. Judíos-elpi xabich nejxasink matabijaliajwa ampathatpijxan. Japi jiw xan naewujanax wut, najum-aechi xanliajwa: “Xam naewujanaxpoxan najur wut tajwujnapijiw naewujanaxpoxan, ja-aech wut, xanal naexasisaxaelen xam naewujanaxpoxan” —aech judíos-elpi xanliajwa. **23** Pe xanal nakiowa japi naewujanax Cristo turpox cruztat japiliajwabej. Judíos japawujajan jumtaen wut, nejxasinka-elpi japawujajan. Judíos-elpibej, jumtaen wut japawujajan, me-ama nejliaklax wut, wejatisipox. **24** Xanal naewujanax Cristo turpox cruztat xatisliajwa. Dios makanot judíos japon pejjiwaliajwa. Makanot-bejpon judíos-elpi japon pejjiwaliajwa. Puexa japi jumtaen wut Cristo turpox cruztat, japi chiekal matabija Dios pejpamamax, Dios pejmatabijsaxbej, Dios chajia nejchaxoel xot, Cristo turpox wut puexa japi bu'welajwapon. **25** Jiw jumtaen wut Cristo turpox cruztat jiw bu'welajwa, japox, me-ama nejliaklax wut,

wejatisipox. Pe amwütjel, japox kaes pejme matabijsax. Me-ama ampathatpijiw pejmatabijsax, jachi-el japox. Dios tapaei wüt Cristo tupaliajwa cruztat, japon tıp wüt, me-ama Dios mamnika-el wüt, ja-aechon. Dios mat-et wüt Cristo pejme dukaliajwa, jawüt jiw matabija Dios pejpamamax, Dios kaes pejme mamnikpox. Me-ama jiw pejpamamax, jachi-el Dios pejpamamax. **26** Takoew, įxamal najut chiekal nejchaxoelde ma amwüt xan jümchiyaxaelenpox! Dios xamal makanot wüt japon pejjiwaliajwam, xamalxot xabicha-el matabijapi ampathatpijixan. Xabicha-elbej paklochow paxi. **27** Dios makanochpi, japi Dios pejjiwaliajwa, japi jiw, me-ama matabijsla wüt, ja-aechi asew jiwliajwa. Pe japi Dios kajachawaech xot, kaes pejme matabijs wüt, ja-aechi. Me-ama ampathatpijiw matabijtpi, jachi-el japi jiw. Ja-aech wüt, ampathatpijiw, xabich matabijtpi, xabich padalaxaeli. Dios makanot jiw japon pejjiwaliajwa, japi jiw, me-ama mamnika-el wüt, ja-aechi asew jiwliajwa. Pe japi jiw Dios kajachawaech xot, kaes pejme xabich mamnik Diosliajwa. Me-ama ampathatpijiw mamnik wüt, jachiyaxil japi jiw. Ja-aech wüt, ampathatpijiw, xabich mamnikpi, japox taen wüt, xabich padalaxaeli. **28** Dios makanot jiw japon pejjiwaliajwa mastaenspi asew jiw. Japi jiw, me-ama pachaema-el wüt, ja-aechpi paklochowliajwa. Ja-aech Dios, makanot wüt jiw japon pejjiwaliajwa, asamatkoi paklochow xabich padalaliajwa. **29** Samata, aton nejchaxoelaxil: “Xan kaes pejme pachae-man. Me-ama asew jiw, jachi-enil xot, Dios namakafit japon pej-atonanliajwa” —chiyaxilon, nejchaxoel wüt. **30** Dios pajut puexa nakmakanot Jesucristo pejjiwaliajwas. Dios naktapaeibej chiekal matabijaliajwas japon pejjamechan, Cristo tıp xot cruztat. Samata, xatis babijaxan isaspoxan ajil Diosliajwa. Isfulasbej Dios nejxasinkpoxan. Dios nakkajachawaetbej xatis babijax isasamatas. **31** Samata, xatis jiw jümchiyaxaes Dios nakkajachawaetpoxliajwa. Dios pejjamechan, chajia lelspx, jüm-aech wüt, jüm-aechox: “įAton pajut ispoxan, japon chapaeyaxil asew jiw asbuan jümch japon aton sitaeliajwas! Japon atonlax chapaesia wüt ispoxanliajwa, įjapon nej chapae' asew jiw Dios kajachawaechpoxan, asew jiw japox jümtaen wüt japi Dios sitaeliajwa!” —aech Dios pejjamechan, chajia lelspx.

Jesucristo kimatamatlaspox cruztat

2 Takoew, xamalxot majt patx wut, xan chimiawuajan naewuajna, maliach matabitaxpoxan Diosxot. Japawuajan majt asew jiw matabija-el. Xamal japawuajan naewuajna wut, chiekal naewuajna chiekal jummatajibijaliawam. Naewuajna wut japawuajan, me-ama xabich matabitax wut, jachi-enil. **2** Xan xamalxotx wut, kaes asaxan nejchaxoela-enil matabijsliawam. Xanlax nejchaxoelafulax naewuajnafulalialawam Jesucristo pejuwajan, cruztat kimatamatlaspox. **3** Xamal nejwujnalel naewuajna wut, tajlewt tathulax. Chiekal mamnika-enil wut, ja-an xan. **4** Naewuajna wut chimiawuajan xamal naexasisliawam, me-ama xabich matabijsnan wut, jachi-enil. Espiritu Santo xan nakajachawaet xamal naexasisliawam naewuajna xoxan. **5** Dios nakajachawaet xotbej, xamal naexasitam xan naewuajna xoxan. Japoxan naexasis-emil, xamal matabijam xot ampathatpijiw matabijapoxan.

Espiritu Santo nakkajachawaetpox xatis matabijaliawas Dios matabijpoxan

6 Cristo chiekal xanaboejapixot, jaxot xan Dios pejjamechan naewuajna, japi jiw kaes chiekal matabijaliawapi Dios. Xan naewuajna xoxan najupa-el ampathatpijiw naewuajanpoxan. Najupa-elbej paklochow naewuajanpoxan. Asamatkoi puexa japi jiw chiekal toepaxael. **7** Xan jiw naewuajna wut, naewuajna Cristo tuppox cruztat japi bu'welijawas Dios. Japoxliawwa Dios chajiakolaxtat, that is-el wutfuk, tamach nejchaxoelon: “Japox jachiyaxaelen jiw bu'welijawan” —aech Dios, tamach nejchaxoel wut. Ampamatkoiyan xanal japawuajan jiw naewuajna, majt jiw matabija-elwuajan. **8** Cristo ampathatat wut, paklochow, ampathatpijiw tato'alpi, matabija-eli japawuajan. Japi japawuajan chiekal matabijaxael wut, kimatamatlaxili Cristo tupalijawa cruztat. Japonlap, kaen, tato'laxael puexa ampathatpijiw, Diosxotsepibej. **9** Paklochow japi matabija-el Jesús, japon Cristopon. Me-ama Dios chajia jum-aech Cristo tupalijawa, ja-aechlisi japox. Dios pejjamechan, chajia lelspx, jum-aech wut, jum-aechox:

“Jiw, nejxasinkpi Dios, japi jiwliawwa Dios chaemt pachaempoxan, majt chinax kaen aton tae-elpoxan,

jumtae-elpoxanbej, nejchaxoela-elpoxanbej” —aech Dios pejjamechan, chajia lelspx.

10 Dios naktapaei matabijaliajwas Cristo tuppox xatisliajwa, Espíritu Santo nakkajachawaet xot. Espíritu Santo puexa chiekal matabijt. Chiekal matabijtbejpon puexa Dios nejchaxoelpoxan.

11 Xatis chiekal matabijaxisal asew jiw nejchaxoelpoxan. Pelax jiw pajut chiekal matabija nejchaxoelpoxan. Ja-aechbej Espíritu Santo. Japon chiekal matabijt Dios nejchaxoelpoxan, japon pajut Dios xot. **12** Dios nejchaxoelpoxan xatis matabijaxisal wajut wajnejchaxoelaxantat. Espíritu Santo, fúloekpon athuxotsik, japon nakkajachawaet xatis matabijaliajwas Dios ispx xatisliajwa. **13** Xanal xamal naewwajnajx wut, naewwajnaenil tajut matabijaxpoxan. Xamal naewwajnajx Espíritu Santoxot matabijt taxpoxan. Xanal jiw naewwajnajx Dios pejjamechan, japi jiwlis pejmatpúatanxot Espíritu Santopi.

14 Jiw, naexasis-eli Jesús pejwujajan, japi pejmatpúatanxot jil Espíritu Santo. Samata, nejxasinka-eli xanal naewwajnajx poxan, xanal matabijaxpoxanbej Espíritu Santoxot. Japoxanliajwa, japi jiw asbuan jumch nejchaxoel: “Japoxan nejliaklaxan” —aechi, nejchaxoel wut. Japi xanal naewet wut, najummatabija-el, Espíritu Santo kajachawaes-esal xot. Samata, japi jiw chiekal jummatatabija-el Dios pejjamechan. **15** Pelax jiw, pejmatpúatanxoti Espíritu Santo, japi jiw chiekal nejchaxoel Dios pijaxan matabijaliajwa. Japiliajwa asew jiw jumchiyaxisal: “Xamal jumampoxan diachwujnajkolax. O, japoxan diachwujnajkolaxa-el” —chiyaxisal. **16** Japoxliajwa Dios pejjamechan, chajia lelspx, jum-aech wut, jum-aechox: “Jiw pajut chiekal matabijaxil wajpaklon Dios nejchaxoelpoxan. Jiw naewwajnajxilbej Dios” —aech Dios pejjamechan. Xatis wajmatpúatanxot Espíritu Santo. Samata, xatis matabijas Cristo nejchaxoelpoxan. Jatis wut, nejchaxoels, me-ama Cristo nejchaxoel.

Chiekal nabichaxaelpox Diosliajwa Jesús pejwujajan naexasiti

3 Takoew, xamalxot majt naewwajnajx wut, puexa Dios pejjamechan chiekal naewwajna-enil. Ja-an xan, xamal naewwajnajx wut, xamal chiekal naexasis-emil xotfuk Espíritu Santo tato'alpox, xamal jelnaexasitam xotbejfuk Cristo pejwujajan. Samata, xamal, me-ama yamxi wut, ja-am Cristo

pejwɔajan naexasitampoxliajwa. **2** Xamal majt matxoela naewɔajnax tampapoxan Cristoliajwa, chiekal matabijaliajwam. Me-ama yamxɔch pen mit miach, naxaeyaxan xaeyaxil xot, ja-an xan, xamal naewɔajnax wɔt tampapoxan Cristoliajwa. Pe amwɔtjel, nakiowa xamal ja-amfuk. Nejnechaxoelaxan kaes chiekal ti's-el, matabija-emil xot Cristoliajwa. Samata, xamal chiekal matabijaximil kaes xabich tampoelpoxan Cristoliajwa. **3** Xamal, me-ama asey jiw, Dios naexasis-elpi, ja-amfuk. Xamal-bej nusasiowlam asey jiwliajwa. Nalotambej. Jasoxan isam xot, diachwɔajnakolax xamal, me-ama asey jiw, ja-am. **4** Me-ama asey jiw, Dios naexasis-eli, duil wɔt kaenejchaxoelaxa-el, ja-ambej xamal. Xamalxot asey jiw jum-aech: “Xanal Pablo pejjiwan” —aechi. Asey jiw xamalxotbej jum-aech: “Xanallax Apolos pejpijwan” —aechi. Japoxan xamal amwɔtjel nakiowa jum-amfuk. Samata, duilam wɔt, kaenejchaxoelaxa-emil.

5 Xan, Pablo, kaes pejme pachaema-enil. Apolosbej kaes pejme pachaema-el. Xan, Apolos swapich, nabistax Diosliajwa. Samata, xanal naewɔajnax wɔt, xamal chiekal naexasitam Jesucristo pejwɔajan. Kaenanɔla xanal chiekal nabistax, me-ama Dios nato'a. **6** Xan matxoela naewɔajnax Dios pejjamechan, xamal-xotx wɔt. Do jawɔx, Apolos xamal naewɔajan. Japon xamal kaes naewɔajan, me-ama Dios nejxasink xamal duilaliajwam. Xan majt xamalxot naewɔajnax wɔt Dios pejjamechan, me-ama mɔthax wɔt, ja-an nejmatpuatanxot. Do jawɔx, xan mɔthaxpi, Apolos, me-ama min matfalan, ja-aechon xamalliajwa. Dios chiekal is xotbej pejbichax nejmatpuatanxot, xamal, me-ama xan mɔthaxpi wɔt, chiekal ti'tpi, ja-am xamal. **7** Mɔthapon kaes pejme pachaema-el. Min matfalanbej kaes pejme pachaema-el. Dioslax kaes pejme pachaem. Dios kajachawaet xot, puexa mɔthaspi chiekal ti'sful. **8** Mɔthapi, min matfalpibej, kolemutje. Pe japi jiw puexa chiekal najɔp Diosliajwa. Dios mosaxaespi Diosxotse kaenanɔla nabisti ampathatat. **9** Xan, Apolos swapich, kaebichax nabistax Diosliajwa. Xamal, me-ama Dios pejlulan wɔt, ja-am xanal nabichliajwan. Xamal Dios pejjiwam xotbej, me-ama Dios isfulba wɔt, ja-ampox. **10** Xan matxoela naewɔajnax xamal Cristo pejwɔajan. Samata, xan, me-ama Dios pejba tuadutxponan wɔt, ja-an Diosliajwa. Amwɔtjel Apolos xamal kaes naewɔajnaful Cristo pejwɔajan. Samata, japonbej, Dios pejba isan wɔt, ja-aechon. Xanwɔx, Apolosbej, japon,

Dios pejba nabichan wut, ja-aechon. Kaenanula Diosliajwa nabisti chiekal nabichaxael Dios pejba chiekal pachaemaliajwa. **11** Xamal naewwajanax Jesús pejwujajan, xamalbej tuadusliajwam Dios xanaboejampox. Xan Jesús pejwujajan xamal matxoela naewwajanax wut xamalxot, japanaewwajanax, me-ama bases, bapijax, ja-aechox, Dios pejba isliajwa. Japabases matxoela isas satat japaba chiekal mamnikaliajwa. Jesucristo, japon pajut, me-ama bases Dios pejbaliajwa. **12** Aton ba isliajwa wut, bases isax toet wut, japabasesmatwujat asan japaba isaxael, toepaxilba. Ja-aech wut, isaxaelon orotat. Ja-el wut, ba isaxaelon platatat. Ja-el wut, ba isaxaelon ia'antat, xabich ommaenkpotantat. Ja-el wut, asan aton isaxael toepaxaelba. Ja-aech wut, esaxaelon tawloba. Ja-el wut, ba esaxaelon baba-uafba. Ja-el wut, esaxaelon maklejbuth-uafba. **13** Cristo pejme fuloek wut, jitat xapaejaxaelon bichaxan, kaenanula pejjiw nabistpoxanliajwa. Do jawut, Cristo pejjiw, japi kaenanula matabijaxael, chiekal nabist wut, o, chiekal nabich-el wut. **14** Cristo xapaejaxael wut japi pejbichaxan, japabichaxan pachaem wut, japi, nabistpi Cristoliajwa, chiekal mosaxaesi Diosxotse. **15** Japi nabistpoxan, pachaemael wut, mosaxisali Cristo. Japi ispoxan wetoejwaxaes jitat. Pe nakiowa, napelsaxili Diosliajwa. Samata, japi jiw, me-ama wiapi jit pejba wematwujatamdaduch wut, ja-aechiyaxael japi jiw.

16 ¿Xamalkat matabija-emil, Dios pejtemploba wut, ja-ampox, Espíritu Santo nejmatpuatanxot duk xot? **17** Aton Dios pejtemploba tabejt wut, japon atonbej Dios boesaxaeson. Japaba Dios pajutliajwa. Xamal, Dios pejtemploba wut, ja-am, japon pejjiwam xot.

18 ¡Najut nabej naekichachajbe! Xamalxot kaen aton nejchaxoel wut ampox: “Xan kaes pejme matabijtax. Me-ama asew jiw, ampathatpijiw, matabijs, xan jachi-enil” —aech wuton, japon kofsaxael japanejchaxoelax. Japon nejchaxoelaxael: “Xan matabijs-enil. Me-ama asew, ampathatpijiw, matabijs, xan jachi-enil” —chiyaxaelon, nejchaxoel wut. Japon aton diachwujanakolax asamatkoi matabijsanaxael. **19** Ampathatpijiw pejmatabijsaxan, japoxan Diosliajwa nejliaklaxan. Japoxanliajwa Dios pejjamechan, chajia lelspx, jum-aech wut, jum-aechox: “Dios kajachawaet ampathatpijiw pejmatabijsaxtat, pajut chiekal matabijaliajwa japi pejmatabijsaxan nejliaklaxanpox” —aech Dios pejjamechan. **20** Dios pejjamechan, chajia lelspx,

jum-aech wut, jum-aechbejpo: “Jiw pejmatabijsaxan, Diosliajwa, japox nejliaklaxan” —aech Dios pejjamechan, jum-aech wut japoxanliajwa. **21** Samata, xamal kaes pejme nejxasinkam wut asan naewuajanpox Jesús pejwajan, xamal nejchaxoelaximil: “Xatis kaes pejme pachaems. Me-ama asew, Jesús pejwajan naexasiti, jachi-esal” —chiyaximil, nejchaxoelam wut. Puexa xanal Jesús pejwajan naewujnax, Dios nato'a xot. Dios puexa ampathatat ispi, japoxan, puexa xamalliajwa. **22** Xan Pablo, Apolosbej, Pedrobej, xanal Dios panto'apin, xamal naewujnaliajwan. Dios ampathat is amwutjel xamal duilaliajwam, asamatkoianliajwabej. Dios tapaeibej xamal asamatkoi tupaliajwam. Dios puexa japoxan tapaei ampathatat xamalliajwa. **23** Xamal, Cristo pejjiwam, isfulaxaelam Cristo nejxasinkpoxan. Cristo, Dios paxulan, japonbej isful pax Dios nejxasinkpoxan.

Nabistpoxan apóstoles

4 Xamal nejchaxoelam wut, ¡nejchaxoelde xanlliajwa: “Pablo, asew jiwbej, paklochowa-el. Japi jiw, me-ama xatis, ja-aechi. Japi nabist Cristoliajwa. Japi naknaewuajan majt jiw matabija-elpoxan, Dios to'as xoti” —amde, nejchaxoelam wut xanlliajwa! **2** Xamal chiekal matabijam. Aton nabist wut pejpaklonliajwa, japon chiekal isaxael puexa tato'laspoxan. **3** Xanbej isfulax, tajpaklon natato'alpoxan. Samata, xamal, asew jiw suapich, jumchiyaxaelam wut xanliajwa: “Pablo chiekal naewujnafula-el jiw. Ispoxan chiekal isfula-elbejpon” —chiyaxaelam wut xanliajwa, xan japoxliajwa nejchaxoelaxinil. Isfulaxpoxanliajwa nejchaxoela-enilbej: “¿Xankat chiekal isfulax Dios natato'alpoxan? O, ¿xankat chiekal isfula-enil Dios natato'alpoxan?” —chi-enil, xan tajut nejchaxoelx wut. **4** Xan tajut matabijs-enil, babijax isx wut Diosliajwa, nabistax wut japonliajwa. Xanfuk tajut chiekal matabijs-enil, Dios chiekal naexasitx wut, o, chiekal naexasis-enil wutbej. Asamatkoi Dios pajut chiekal xan najumchiyaxael japoxanliajwa. **5** Samata, ¡xamal nabej nejchaxoele' asew jiwliajwa, nabisti Diosliajwa: “Japi chiekal nabich-el Dios to'aspox” —nabej aeche', nejchaxoelam wut! ¡Asbuan jumch wajpaklon Jesús wujnawesaxaelam pejme pasliajwasik! Jesús pask wut, japon pajut puexa jiw chiekal itpaeyaxael japi kaenanula ispoxanliajwa. Maliach ispoxanbej

tulaela itpaeyaxaelon. Japon itpaeyaxaelbej, ma-aech xot jiw kaenanula japoxan is. Do jawux, Dios jumchiyaxael kaenanula jiwliajwa nabisti japonliajwa: “Xam diachwajnakolax chiekal nabistam xanliajwa. Samata, xan xabich nejchachaemlax xamliajwa” —chiyaxael Dios kaenanula japi jiwliajwa.

6 Takoew, jxan chiekal nanaewe'e tajutliajwa jumchiya-xaelenpox, Apolosliajwabej! Chiekal nanaewetam wut, jxamal chiekal naexasi'e Dios pejjamechan, chajia lelspx! Dios pejjamechan, chajia lelspx, jum-aech wut, jum-echox ampox, fiat wut: “Jum-am wut, jnabej jum-aech!: ‘Ampon kaes pejme xabich pachaem. Me-ama asan aton, jachi-elon’ —nabej aeche!’” —aech Dios pejjamechan. Samata, nejchaxoelam wut, jnabej nejchaxoele!: “Ampon aton, Dios pejjamechan naewujjanpon, kaes pejme pachaem. Me-ama asan aton, Dios pejjamechan naewujjanpon, jachi-el japon aton” —nabej aeche!, nejchaxoelam wut! **7** jAchankat xamal jum-aech: “Xamal kaes pachaemampim. Me-ama asew jiw, jachi-emilpim” —aechkat xamalliajwa? Xamal amwutjel nejewpoxan, japoxan, Dios xamal chaxduw. Dios xamal chaxduw wut, jma-aech xotkat japoxanliajwa jum-am, me-ama xamal najut chiekal faekam wut, ja-amkat?

8 Xamal asbuan jumch nejchaxoelam: “Xatis xabich matabijas Dios pejjamechan, asew jiw naknaewujjan xot. Samata, nakwewe'pa-el japi kaes naknaewujnalialjwa” —am xamal, nejchaxoelam wut. Xamal japox nejchaxoelam wut, diachwajnakolaxa-el. Chiekal matabijam wut Dios pejjamechan, xamal, me-ama tajpaklochowam wut, jachiyaxaelam. Diachwajnakolax Dios pejjamechan naexasiti pejpaklochowam wut, ja-am wut, xanal nejchachaemlaxaelen xamalliajwa. **9** Xan tajut nejchaxoelx: “Dios natapaei puexa xanal apóstolespin ampathatpijiw xanal nanejweslialjwa. Japi jiw jum-aechbej: ‘Xatis apóstoles beyaxaes’ —aechi. Samata, puexa ampathatpijiw, Dios pej-ángelbej, chiekal xanal natachaemapi taeliajwa jachiyaxaelpox xanalliajwa” —an xan, nejchaxoelx wut. **10** Asew jiw nejchaxoel xanalliajwa: “Japi Cristo pejjiw xot, nejliakla” —aechi xanalliajwa, nejchaxoel wut. Pe xamallax najutliajwa asbuan jumch nejchaxoelam wut, jum-am: “Xatis Cristo pejiws xot, xabich matabijas” —am, nejchaxoelam wut. Nakaewa najum-ambej xanalliajwa: “Japi mamnika-el” —am xamal xanalliajwa. Xamallax najut nejchaxoelam wut, jum-am: “Xatis

kaes pejme mamnikas” —am xamal. Asew jiw xanal nasitael. Pelaxi xamal japi jiw sitaen. **11** Xanal jiw naewwajntax wut asapaklowaxanxot, nabijatax. Amwutjelbej nakiowa nabijatax. Xanal asamatkoi litaxaelax. Minsilabej. Nawejilbej chamoeyaxan chiekal naxoelajwanlejen. Jiw babijaxan isfulbej xanalliajwa. Tajbachan nawejilbej, xabich nanwamtax xot asatwajnwuchanlel. **12** Asamatkoi xanal xabich damlax, xabich nabistax wut tejew wuajsliajwan. Asew jiw jum-aech babejjamechan xanalliajwa. Ja-aech wut, xanallax Dios kawwajntax japi jiw Dios kajachawaesliajwas. Asew jiw babijaxan isful wut xanalliajwa, xanal talala-el japi jiwliajwa. **13** Asew jiw babejjamechan jum-aech wut xanalliajwa, xanallax jum-an chimiajamechan japi jiwliajwa. Asew jiwliajwa, xanal, me-ama xabich pachaema-elpoxan wut, ja-an japiajwa. Pomatkoicha, hasta amwutjel, jasoxtat xanal duilafulax.

14 Xan ampox lelx wut, lela-enil xamal nadalaliajwa. Xanlax lelx ampox xamal naewwajnalialjwan. Xamal naewwajntax wut, me-ama taxikola naewwajntax wut, ja-an xamalliajwa, xamal nejxasinkax xot. **15** Xamal naewwajntax wut Jesús pejwujajan, naexasitam japawujajan Dios xamal bu'welialjwa babijaxan isamproxanliajwa. Samata, xan, me-ama nej-axnan wut, ja-an xamalliajwa, Jesús pejwujajan naewwajntax wut, naexasitam xot. Do jawux, Jesús pejwujajan naexasitam wut, xabich asew jiw kaes xamal chanaekabuana chiekal matabijaliajwam. **16** Amwutjel xamal jum-an chiekal duilaliajwam. Me-ama xan xamalxot chiekal dukx wut, xamalbej ja-amde, duilam wut!

17 Samata, Timoteo to'ax xamal poxade, japon xamal naewwajnalialjwa, chiekal duilaliajwam, me-ama xan chiekal dukx, jachiliajwam. Xan Timoteo xabich nejxasinkax, chiekal naexasit xoton Jesús pejwujajan. Samata, Timoteo, me-ama taxulan, jabuan-an. Timoteo xamal chapaeyaxael nejchaxoelaliajwam, ma-an xan, majt dukx wut xamalxot, Jesús pejwujajan naexasitx xot. Me-ama xan potwajnwucha naewwajntax, jachiyaxael Timoteo, xamalxot wut. **18** Asew jiw xamalxot pajut nejchaxoel: “Xatis kaes pejme pachaems, xabich matabijas xot. Samata, Pablo xatis bej naktaeyaxilbej kaes naknaewwajnalialjwa” —aech japi jiw, pajut nejchaxoel wut xanliajwa. **19** Pe nakiowa, Dios natapaei wut, kaematkoijan swapich wut, xamal taeyaxaelen. Xan japi jiw tajut chiekal taeyaxaelen, matabijsliajwan,

diachwüajnakolax japi jiw mamnik wüt Espíritu Santo pijaxtat. Jachi-el wüt, xan tajut chiekal matabijsaxaelen, japi jiw asbuan jümch pajut jüm-aechpoxankal. **20** Dios pejjiw matabijaxaes, isful wüt pachaempoxan, Dios kajachawaech xoti. Japi jiw asbuan jümch pajut jümdui-el isliajwa pachaempoxan. **21** Xamalxot patx wüt, ¿xamalkat nejxasinkam xan kastikaliajwan, xamal babijaxan isam xot? O, ¿xamalkat nejxasinkam xan chiekal naewüajnalijwan, xamal nejxasinkax xot?

Corinto paklowaxpijw, Jesús pejwüajan naexasitixot, dukpox xabich babijax ispon

5 Kaen aton xabich babijax is xamalxot, fit xoton pax pijow. Jiw, naexasis-eli Jesús pejwüajan, jasox is-el, me-ama japox. **2** Pe xamal japon aton fias-emil. Asbuan jümch xamal najutliajwa nejchaxoelam: “Xatis kaes pejme pachaems. Me-ama asew jiw, jachi-esal” —am xamal, nejchaxoelam wüt. ¡Jasox xamal nabej nejchaxoele! ¡Xamal xabich nadalaxaelam japon atonliajwa! ¡Xamal to'im japon aton chijiyaliajwa xamalxot, pejme kaxa-elaliajwapon! **3** Diachwüajnakolax amwütjel xan tajut xamalxota-enil. Pe nakiowa, nejchaxoelx wüt, xan tajut, me-ama xamalxotx wüt, ja-an. Matabijtax japon aton babijax ispox. Samata, xanliajwa japon aton wewe'pas kastikax. Xamal japon aton kastikaxaelam, xan jaxota-enil wüt. **4** Xamal nata-mejlam wüt jümchiliajwam japon aton babijax ispoxliajwa, jawüt xan nejchaxoelaxaelen xamalliajwa. Jawütbej wajpaklon Jesús xamal kajachawaesaxael chiekal matabijaliajwam, machiyaxaelam japon atonliajwa. **5** Japon, xabich babijax ispon, ¡xamal to'impon chijiyaliajwa xamalxot, Satanás tato'laspi poxaliajwapon! Jaxotde xabich nabijat wüt, pajut chiekal nejchaxoelaxaelon. Ja-aech wüt, japon pejme chiekal naexasisaxaelbej Jesús pejwüajan. Ja-aech wüt, japon bu'weyaxaes asamatkoi, Jesús pejme pask wüt.

6 ¡Xamal najut nabej nejchaxoele!: “Xatis kaes pejme pachaems. Me-ama asew jiw, jachi-esal” —nabej aeche!, nejchaxoelam wüt, japon, xabich babijax ispon, xamalxot duk xoton! Xamal chiekal matabijam. Aton babijax isful wüt xamalxot, japon aton tabejsaxael puexa Jesús pejwüajan naexasiti. **7** Samata, japon aton, babijax isax nejxasinkpon, ¡xamal chijiyax to'im tabejsasamatapon asew jiw xamalxot!

Japon aton, me-ama padujpansap, levadura kitanialessap, ja-aech japon aton, babijax isax nejxasink xot. Pe xamal pajelnejchaxoe-laxan, Jesús kajachawaet xot babijax isasamatam. Ja-am wüt, Diosliajwa, me-ama pajelsap, levadura kitanialesal sap pan isliajwa, ja-am xamal. Cristo túp xot cruztat nakbú'welijaowa babijaxan isaspoxanliajwa, Diosliajwa japon, me-ama wajan Cordero, Pascuafiesta wüt boesaspon, jakitison. **8** Samata, xatis nejchachaemlas. Me-ama judíos nejchachaemil Pascuafiesta wüt, jatisbej xatis. Judíos pelt padujpansapan, japasapan ajilaliajwa japixot. Jachiyaxaesbej xatis. Samata, majt babijaxan isaspoxan kofaxaes kaes is-elaliajwas babijaxan.

9 Majt asacarta xamalliajwa lel x wüt, jaxot chiekal chanaekabuanax nachalasangamatam jiw, babijaxan isaxan nejxasinkpi súpich, asew watho' bú'moejsax nejxasinkpi súpichbej. **10** Naexasis-elpíxot Jesús pejuwajan, asew watho' bú'moejt. Asew japixotbej, pejew wüt, xabich nejpas-esal pejew. Xabich jumch kaesasiapi. Asew nejxasink natkowax. Asew nejxasinkbej ídolos kawuajnax. Japacarta xato'ax wüt, xato'a-enil xamal nadijaliajwam japi jiwxot. Jiw babijaxan ispi, japi pothata xajup. Samata, nakolaximil japi jiwxot. Japixot xamal nakolasiam wüt, nakolaxaelam ampathatat. **11** Xan chajia asacarta lel x wüt, naewuajnasian ampo. Aton jum-aech wüt: “Xan naexasitx Jesús pejuwajan” —aech wuton, pe japon aton nakiowa asew watho' bú'moejt wüt, jasi jiw súpich, xamal nabej nanuams! Xamalxot asan aton pejew wüt, japon aton nejpas-esal wütbej, xamalxot asan aton ídolo kawuajan wütbej, jasi jiw súpich, xamal nabej nanuams! Xamalxot asan aton jum-aechful wüt babejjamechan asew jiwliajwa, xamalxot asan aton saxa feyax nejxasink wütbej, xamalxot asan aton nejxasink wütbej natkowax, jasi jiw súpich, xamal nabej nanuams! Jiw ja-aechpi, xamal tadut wüt xaeliajwa, japi jiw súpichbej, nabej naxae! **12-13** Dios xan natapae-el jumchiliajwan naexasis-elpiliajwa Jesús pejuwajan: “Ampi jiw, babijaxan is. Samata, japi xabich kastikaxaes” —chiliajwan. Dios pajut japox jumchiyaxael japiliajwa. Xabich kastikaxaesbejpi. Xamalxotlax naexasiti Jesús pejuwajan babijax is wüt, Dios tapaei xamal najut jumchiliajwam, chaemsliawambej: “Ampi babijaxan is. Samata, xatis wajut japi kastikaxaes” —chiliajwam. Samata, to'im japon aton xamalxot chijiyaliajwa, xabich babijax is xoton!

**Wuajan chaemsaxaelpox, Jesús pejwuajan
naexasiti wuajan wut nakaewaliajwa**

6 Xamalxot asan babijax is wut xamalliajwa, ¡japon aton nabej buflae' juez poxade japox wuajan juez xamal wechaemsliajwa! Xamallax tadusaxaelam asew jiw, Jesús pejwuajan naexasiti, japi kajachawaesliajwa japox wuajan chaemsliajwam. **2** Xamal chiekal matabijam. Cristo asamatkoi fuloek wut, jawut naexasichpis Jesús pejwuajan Dios naktapaeyaxael jumchiliajwas kaenanula naexasis-eli Jesús pejwuajan: “Xam babijaxan isam. Samata, Dios xam kastikaxael” —chiliajwas. Samata, xamal amwutjel chiekal matabijam wuajan chaemsliajwam, asew jiw xamalxot pejbw'wuajan wut. Puexa japox chiekal tampa xamalliajwa. **3** Xamal chiekal matabijambej. Asamatkoi xatis jumchiyaxaesbej kaenanula asew ángeles, babijaxan ispiliajwa: “Xam nejbw'wuajan Diosliajwa, babijaxan isam xot. Samata, Dios xam kastikaxael” —chiyaxaes. Samata, xatis amwutjel matabijas wajut chaemsliajwas, wuajan wut xatisxot. **4** Samata, xamalxot wuajan wut, ¿ma-aech xotkat aton bw'folam juez poxade japon juez wuajan wechaemsliajwa? Japi juez, Jesús pejwuajan naexasis-el. Xamal fulaeyaximil juez poxade japox wuajan juez wechaemsliajwa. **5** Xamal japox jum-an nadalaliajwa. Xamalxot wuajan wut, ¿xamalxotkat kaen aton ajil, chiekal matabijtpon wuajan chaemsliajwa? **6** Xamal Jesús pejwuajan naexasitam xot, kaen xamalxot babijax is wut, ¡nabej buflae' juez poxade japon aton tasalaliajwam jaxotde!

7 Japon aton bw'folam wut jueces poxade, japi jueces, Jesús pejwuajan naexasis-eli, japi wultaen wut japox, pachaemaxil xamalliajwa. Naexasis-elpi Jesús pejwuajan matabijaxael xamal chiekal duila-emilpox. Samata, ¡babijaxan ispon nabej buflae' juez poxade! Jelnaexasiti Jesús pejwuajan, babijaxan is wut xamalliajwa, kaes pachaem tapingliajwam japi japoxan isliajwa. Japi nejew natkowa wut, tapingliaxaelam natkowaliajwa. **8** ¡Pelax xamal babijaxan isfulam nakaewaliajwa! ¡Wenatkowambej asew jiw, naexasiti Jesús pejwuajan!

9-10 ¡Xamal najut nabej naekichachajbe'! Xamal chiekal matabijam, babijaxan ispi, japi duilaxil Diosxotse. Samata, ¡nabej is pachaema-elpoxan, najut isasiampoxan! Poejiw, asew watho' bw'moejtpi, japibej duilaxil Diosxotse. Jiw ídolos

kawuajanpi, japibej duilaxil Diosxotse. Pejwatho'pi, asew watho' naebu'moejtpi, japibej duilaxil Diosxotse. Nakaepojewa nabu'moejtpi, japibej duilaxil Diosxotse. Jiw kithakabej, duilaxil jaxotse. Jiw pejew wut, jumch xabich kaesasiapi, japibej duilaxil jaxotse. Saxa femaenkpi, japibej duilaxil Diosxotse. Jiw, buxwajanmaenkpi, japibej duilaxil Diosxotse. Asew jiw, naekichachajbapi wenosliajwa asew jiw pejew, japibej duilaxil Diosxotse. **11** Asew jiw xamalxot majt babijaxan isful. Pe amwutjel, japi is-el babijaxan, Dios webeltaens xot babijaxan ispoxanliajwa, Jesucristo tup xot cruztat japiliajwa. Diosliajwa japi jiw pachaemlisi. Samata, japi Dios pejiw. Espiritu Santobej kajachawaech naexasisliajwapi Dios.

Isaxilpox babijax Jesús pejuajan naexasiti

12 Asew jiw jum-aech: “Amwutjel xan na-it-ele-el majt nafiatpox. Samata, isasianpoxan isaxaelen” —aechi. Pe xatis puexa isasiaspoxan isas wut, chiekal duilaxisal Diosliajwa. Diachwujnakolax xan na-it-ele-el puexa isasianpoxan isliajwan. Pe xan tajut natapaeyaxinil tajnejchaxoelax natato'laliajwa babijaxan isliajwan, japox babijax, me-ama tajpaklon wut, jachiliajwan. **13** Asew jiw jum-aech wutbej: “Naxaeyaxan tajwoejtliajwa. Tajwoejtbej naxaeyaxanliajwa” —aech wuti, japi jum-aechpox, diachwujnakolax. Pe Dios asamatkoi toesa- xael naxaeyaxan, wajwoejanbej. Dios nak-is-el asew watho' bu'moejsliajwas. Dios nak-is japon tanbichliajwas. Dios nak- kajachawaetbej xatis chiekal mamnikaliajwas. **14** Wajpaklon Jesús tup wut cruztat, Dios mat-echpon pejme dukaliajwa. Asamatkoi xatisbej Dios nakmat-eyaxael pejme duilaliajwas.

15 Xamal matabijaxaelam, xatis kaenanula Cristo pejiw xot, me-ama Cristo pejubu't wut, jatis! Samata, asew watho' bu'moejsaxisal, plata kanapi poejiw bu'moejsaxtat. **16** Xamalbej matabijaxaelam, kaen aton japow bu'moejt wut, japi, me-ama kaen wut, ja-aechlisi! Dios pejjamechan, chajia lelspos, jum-aech wut, jum-aechox japoxliajwa: “Japi kolenje, me-ama kaen wut, ja-aechlisi” —aechox. **17** Naexasitpon Cristo pejuajan, japon, Cristo suapich. Japi, me-ama kaen wut, ja-aechi Diosliajwa.

18 Samata, nabej bu'moejs asew watho'! Nejmachbabijaxan jiw is wut, pejubu'an tabejs-esal. Pe nakiowa, aton asew watho' bu'moejt wut, japon aton pajut natabejt Diosliajwa. **19** Xamalbej

matabijaxaelam! ¡Xamal Diosliajwa, me-ama Espíritu Santo pejtemploba wut, ja-am, Espíritu Santo duk xot nejmatpreatanxot! Pe Dios to'a Espíritu Santo dukaliajwa xamal nejmatpreatanxot. Nejbu'anbej xamal najutliajwa-el isliajwam babijaxan. **20** Xamal Dios wuajt. Cristo tup wut cruztat, japon mot xamal babijaxan isampoxanliajwa. Samata, ¡kaes babijaxan nabej is! Babijaxan is-emil wut, jiw sitaeyaxael Dios.

**Pablo naewuajanpox Jesús pejwuajan
naexasiti nakjiyaxliajwa**

7 Majt xamal carta xato'am wut xanliajwa, japacartaxot nawuajnachaemtam nakjiyaxliajwa. Amwut nawuajna-chaemtampoxliajwa amxot lelaxaelen xamal chiekal chanaekabuanaliajwan nakjiyax. Kaes pejme pachaem, aton tamach laejaliajwa, pawis fis-elaliajwa. **2** Pe poejiw xabich asew watho' bu'moejt xot, jasox isasamata, kaes pejme pachaem kaenanula poejiw nakjiyaliajwa, kaenanula watho'bej nakjiyaliajwa, asbuan jumch asew poejiw bu'moejsasamata watho'. **3** Kaenanula poejiw chiekal laelpaxael pijowxot. Jachiyaxaelbej kaenanula watho'. Chiekal laelpaxaeli pamalxot. **4** Kaenanula watho' pamalpi, japi watho' pajutliajwa-el pejbu'an. Japi pejbu'an pamalliajwa. Jachiyaxaelbej poejiw pejwatho'pi. Japi poejiw pejbu'an pajutliajwa-el. Japi pejbu'an pijowliajwa. **5** Samata, xamal, watho'am, ¡nabej nejwesle! kaeyaxtat moejsliajwam, nejmol suapich! Xamal poejwam, ¡ja-amdebej! Pelax xamal, nijow suapich, kaenejchaxoelaxam wut Dios piach kawuajnalialjwam, ¡jawut kaeyaxtat nabej moejs, nijow suapich! Jachiyaxaelam asax nejchaxoelasamatam, piach Dios kawuajnalialjwam wut. Dios kawuajnax buxtoetam wut, nijow suapich, pejme kaeyaxtataxaelam. Jasox isaxaelam xamal babijaxan isasamatam, Satanás naekichachajbasamata xamal.

6 Xan ampxo lelx wut, to'a-enil puexa xamal nakjiyaliajwam. Pe ampxo xan lelx xamal chiekal matabijaliajwam. Nakjiyasiam wut, ¡nakjiyim! **7** Nejaxasinkax xamalbej tamach laelpaliajwam, me-ama xan pawis fis-enil, jachiliajwam. Dios kaenanula jiw kajachawaet duilaliajwa, me-ama Dios nejxasink. Samata, asew jiw nakjiyaxael. Asew nakjiyaxil.

8 Xamal poejwam tamach laelpampim, xamal watho'am tamach laelpampimbej, xamal watho'am nejmol naetupimbej,

puexa xamalliajwa jum-an ampox. Pachaem nakjiya-elaliajwam, me-ama xan, jachiliajwam. **9** Pe xamal boejtaliasaximil wut, jnakjiyim, kaes nejchaxoelasamatam asaxan isaxan, japow suapich!

10 Xamal, nakjiyampim, jumchiyaxaelen. Japox taj-nejchaxoelaxa-el. Pe japox, Dios nejchaxoelpox, jumchi-yaxaelen. Xamal watho'am, jnabej pels nejmol! **11** Pawis pamal fo'apow, japow asan aton fisaxil. O, japow nospaeyaxael, pamal suapich, pejme nawoeyaliajwa, chiekal pachaemaliajwapi. Poejiwbej pel-saxil pejwatho'jiw.

12 Asew jiw, xamalxotpijiw, xan japi jumchiyaxaelen tajut nejchaxoelxprox nakjiyaxliajwa. Japox wajpaklon Jesús nabuxto'a-el. Jesús pejwujajan naexasitpon, japon pijow, Jesús pejwujajan naexasis-elpow wut, pe pijow nejxasink wut laejaliajwa pamalxot, ja-aech wut, japon aton fo'axil pijow. **13** Jesús pejwujajan naexasitpow, japow pamal, naexasis-elpon wut Jesús pejwujajan, pe japon nejxasink wut laejaliajwa pijowxot, ja-aech wut, japow fo'axil pamal. **14** Naexasis-elpon Jesús pejwujajan, japon aton Dios kajachawaesaxaes pijow pijaxtat. Pawisbej, naexasis-elpow wut Jesús pejwujajan, japow Dios kajachawaesaxaes pamal pijaxtat. Do ja-aech wut, japi paxibej Dios kajachawaesaxaes. Dios kajachawaes-el wut, japi paxi, me-ama asew, Jesús pejwujajan naexasis-eli paxi wut, jachiyaxael japi paxi. **15** Pawis, Jesús pejwujajan naexasitpow, japow pamal, naexasis-elpon wut Jesús pejwujajan, japon aton pijow fo'asia wut, jnej fo'epon pijow, japow tamach laejaliajwa! Atonbej, Jesús pejwujajan naexasitpon, japon pijow, Jesús pejwujajan naexasis-elpow wut, japow fo'asia wut pamal, jnej fo'epow pamal, japon aton tamach laejaliajwa! Dios jasox nejxasink xamal chiekal duilaliajwam wujajanjilaxtat. **16** Xamal watho'am, kaenanula nejmol, naexasis-elpon wut Jesús pejwujajan, xamal chiekal laelpam wut, nejmol suapich, ja-am wut, nejmol bej naexasisaxaelbej Jesús pejwujajan. Xamal poejwambej, kaenanula nijow, naexasis-elpow wut Jesús pejwujajan, xamal chiekal laelpam wut, nijow suapich, ja-aech wut, nijow bej naexasisaxaelbej Jesús pejwujajan.

17 Ma akasestat xamal iduilamdo' naexasis-emil wutfuk Jesús pejwujajan, jdo jaxot xamal nakiowa duilafulde! Ma akasestat xamal inabistamdo' naexasis-emil wutfuk Jesús pejwujajan, jdo

japabichaxan nabichfulde! Japox xan potuajnucha naewuajnaexasiti Jesús pejuwajan. **18** Jesús pejuwajan naexasitpon, circuncidas wut Dios pejmarkaxliajwa, japon nejxaejwaxisal circuncidaspoxliajwa. Asan Jesús pejuwajan naexasit wut, japon circuncida-esal wut, ¡japon kito'axil circuncidaliajwas! **19** Circuncidax, o, circuncida-elpoxbej, japoxan koloeyaxanxot, Diosliajwa kaes asax pejme pachaema-el. Japoxan koloeyax chiekal najur. Kaes pejme pachaempox naexasisliajwas Dios tato'alpox. **20** Jesús pejuwajan naexasiti kaenanula ma iduildo', do jaxot duilafulaxaeli. Ma japi inabistdo' akasestat naexasis-el wutfuk Jesús pejuwajan, do japoxan japi nabichfulaxael. **21** Asew jiw xamalxot esclavospi. Naexasit wuti Jesús pejuwajan, ¡japi nej nejchaxoela-ele' malech nabistpoxliajwa paklochowliajwa! ¡Nejmach chiekal nej nabichpi nabistxot! Japi pejmatkoi wepach wut nakolaliajwa, ¡nej nakole paklochowxot! **22** Kaen esclavo naexasit wut wajpaklon Jesús pejuwajan, japon Jesús pamakan. Pe japon, esclavo-el wut, ja-aechbejpon. Japon nabist wut paklonliajwa, jawutbej, me-ama nabiston Jesúsliajwa. Aton, esclavo-elpon, naexasit wut Jesús pejuwajan, japon aton Cristo pej-esclavo wut, ja-aechon. **23** Dios xamal wuajt wut, moton xabich ommaeyaxtat. Samata, asew jiw tato'al wut babijaxan isliajwam, ¡xamal nabej is japoxan! **24** Samata, Jesús pejuwajan naexasitampim, kaenanula duilamxot, ¡do jaxot xamal duilafulde! Nabistampox, ¡japoxbej nabichfulde! Xamal kaenanula ja-am wut, Dios kajachawaesaxael.

25 Xamal nakjiya-emilpim, naewuajnaaxaelen nakjiyaxliajwa, majt nawuajnachaemtampox. Wajpaklon Jesús nabuxto'a-el japox xamal naewuajnalialjwan. Pe xan tajut nejchaxoelxox xamal jumchiyaxaelen. Dios nabeltaen xot, nata-paei japon pejjamechan jiw naewuajnalialjwan. Samata, xamal naewuajnaaxaelen. **26** Xatis amwutjel duilafulas pachaema-elmatkoiyantat. Samata, xan nejchaxoelx: “Kaes pejme pachaem, nakjiya-esal wut tamach laelpaliajwas” —an, nejchaxoelx wut. **27** Samata, xamal poejwam kaenanula nijow wut, ¡nabej fo'e! ¡Chiekal kaelel bu'laelpde nejwatho'! Xamal poejwam, nakjiya-emil wutfuk, ¡nabej wulweke' watho' nakjiyalialjwam! **28** Fitam wut nijow, japox chaemila-el. Pansiawbej fit wut pamal, japoxbej chaemila-el. Pe nakjiyapi, japi jiwliajwa asamatkoi xabich tampoelaxael wewe'paspoxanliajwa. Samata, xan nejxasinkax

jumchiliajwan, xamal poejwam kaenanula watho' notam wut bunbijasasamatam.

29 Takoew, xan nejxasinkax xamal jumchiliajwan ampox. Matkoijan xabich xatis nakwewe'pa-el laelpaliajwas. Samata, pejwatho'pi, japibej wajpaklon Diosliajwa xabich nabichaxael. Me-ama tamach laelpi xabich nabist Diosliajwa, jachiyaxaelbej pejwatho'pi. **30** Puexa jiw nejchaxoelaxael nabichliajwa Dios pijax bichax. Jiw wetups wut pejjiw, xabich nejxaejwas wutbej, xabich nabichaxaelpi Dios pijax bichax. Nejxaejwaxkal japi boejxatataeyaxil. Jiw nejchachaemilpi, japibej xabich nabichaxael Dios pijax bichax, me-ama nejchachaemla-el wut, jachiliajwapi. Jiw pejew wut, japibej pasiowlaxil pejew. Japibej xabich nabichaxael Diosliajwa. **31** Pejew xabich mowapi, pejew mowa wut, japi jiw nejchaxoelaxil pajutliajwakal. Japibej Diosliajwa xabich nabichaxael, asamatkoi puexa ampathat chiekal toepaxael xot. Samata, puexa jiw pejewkalliajwa xabich nejchaxoelaxil.

32 Xan nejxasinkax xamal nejchaxoela-elaliajwam ampathatpijajan. Pawis fis-elpon, japon nejchaxoelaful nabichliajwa wajpaklon Dios pejbichax, Dios nejchachaemlaliajwa japon atonliajwa. **33** Pijowponlax nejchaxoel ampathatpijajan. Nejchaxoelbejpon puexa isliajwa pijow chiekal nejchachaemlaliajwa japonliajwa. **34** Pawis, pamal fis-elpow, japow nejchaxoel wajpaklon pijax bichax. Japow nejchaxoel Dios tanbichliajwa. Pawis, pamalpowlax, japow nejchaxoel ampathatpijajan. Nejchaxoelbejpow puexa isliajwa pamal chiekal nejchachaemlaliajwa japowliajwa.

35 Japox jum-an wut, xamal fias-enil nakjijasamatam. Pe japox jum-an xamal naewuajnalijwan chiekal nejchaxoelaliajwam. Nejxasinkax xamal chiekal duilaliajwam. Nejxasinkaxbej puexa xamal chiekal tanbichliajwam wajpaklon Dios.

36 Aton chajia jumdut wut pawis fisliajwa, japow chiekal ti't wut, japon aton nejchaxoel: "Xan japow fitx wut, japox pachaemaxael xanliajwa" —aechon, nejchaxoel wut. Ja-aech wut, japon aton japow pawis fisaxael. Japox chaemila-el. **37** Asan aton jum-aech wut: "Xan pawis fisaxinil" —aech wuton, nejchaxoel wut, japox pachaem japonliajwa. **38** Samata, aton fit wut jumdutpow, japox chiekal pachaem japon atonliajwa.

Asanlax, pawis fis-el wut, japon atonliajwa japox kaes pejme pachaem.

39 Pamal laeja wut, japow pamalxotaxael. Fisaxilow asan. Jasox jum-aech Dios pejjamechan, chajia lelspx. Pelax pamal tɔp wut, ja-aech wut, pachaem japow asan fisliajwa. Japow fisaxael Jesús pejjwajan naexasitpon. **40** Xan nejchaxoelx: “Pamal naetɔpspow, asan fis-el wut, ja-aech wut, kaes pejme nejchachaemlaxael japow” —an, xan nejchaxoelx wut. Xan jasox nejchaxoelx, Espiritu Santo nakajachawaet xot.

Choef xua'atpox ídolos-ofrendaliajwa, japawi nama wut, a sew jiw xael

8 Majt xamal carta xato'am wut xanliajwa, nawuaj-nachaemtam: “¿Choef xua'taspi ídolos-ofrendaliajwa, japawi naman wut, pachaemkat xaeliajwas?” —na-am xamal, nawuajnachaemtam wut. A sew, naexasiti Jesús pejjwajan, japawi xaeliajwa nejxasinka-el. Puexa xatis chiekal matabijas japawi pachaempox xaeliajwas. Pe nejchaxoels wut: “Xatis kaes pejme chiekal matabijas. Me-ama a sew, Jesús pejjwajan naexasiti, xae-elpi japawi, xatis jachi-esal” —tis wut, nejchaxoels wut, japanejchaxoelax pachaemaxil. Samata, nejchaxoelaxisal japox. Kaes pachaem, nejchaxoelaliajwas: “Xatis nejxasinkas japi jiw, xae-elpi japawi. Samata, xatis xaeyaxisal japawi japi jiw nakkaechataesamata” —chiyaxaes, nejchaxoels wut. Jatis wut, xatis japi jiw kajachawaesaxaes chiekal naexaxisliajwapi Dios. **2** Aton pajut nejchaxoelpon: “Xan japoxanliajwa puexa chiekal matabijtax” —aech wuton, japon aton pajut nanaekichachajba. Japon wewe'pas puexa kaes chiekal matabijsliajwa. **3** Dios nejxasinkpon, japon aton Dios matabijtas.

4 Xatis chiekal matabijas. Ídolos chinax pachaema-el, asbuan jumch japoxan ídolos xot. Puexa ídolos, japoxan Dios-el. Kaen Dios athuxotse duk. Jiw choef xua'at wut ídolos-ofrendaliajwa, japox ofrenda asaxliajwa chinax pachaema-elbej. **5** Jiw chiekal matabija-el. Samata, asbuan jumch jum-aechi: “Ampathatat xabich maenk dioses, athuxotsebej” —aechi. **6** Pelax xatis chiekal matabijas. Kaen waj-ax Dios. Do japon chiekal kae-kolan. Do kaes asan Dios ajil, me-ama Dios, jason. Dios puexa is xatis duilaliajwas, japon nejxasinkpoxan isliajwas. Chiekal matabijasbej. Kaen, wajpaklon Jesucristo. Japon

Dios to'as puexa isliajwa. Japon nakkajachawaet xot, laelpas ampathatat.

7 Puexa naexasiti Jesús pejwujajan, japi chiekal matabija-el ídolos chinax pachaema-elpox asaxliajwa. Asew jiw japixot majt ídolos kawujajan. Amwutjel japi jiw chiekal Dios xanaboeja-elfuki. Samata, japi jiw xael wut namanwi, ídolos-ofrendaliajwawi, japi jiw nejchaxoel: “Xatis japawi xaes xot, isas pachaema-elpox” —aechi, nejchaxoel wut. **8** Xatis chiekal matabijas. Jiw choef xua'at wut ídolos-ofrendaliajwa, japawi xaes wut, o, xae-esal wutbej, Diosliajwa japoxan koloeyaxan chiekal pachaem. **9** Pachaem xatis japawi xaeliajwas. ¡Pe chiekal taeyaxaes! Asew, naexasiti Jesús pejwujajan, jum-aech wut: “Dios nejxasinka-el japawi xaeliajwas” —aech wuti, ja-aech wut, ¡nabej xae' japawi! Xamal kaechataen wuti, ja-aech wut, japibej xaeyaxaelbej japawi. Xael wuti, kaenanula nejchaxoela-xaeli: “Xan babijax isx Diosliajwa” —chiyaxaeli, nejchaxoel wut. Jasox japi nejchaxoelaxael, chiekal xanaboeja-el xotfuki Dios. **10** ¡Xamal nabej xae' japawi, ídolos pejtemplobaxoti! Xamal chiekal matabijam. Xaelam wut japawi, japox chaemila-el. Pe nakiowa, xaelam wut, asan Jesús pejwujajan naexasitpon, japon chiekal Dios xanaboejs-el wutfuk, xamal kaechataen wuton, ja-aech wut, japon aton bej xaeyaxaelbej japawi. Ja-aech wut, japon aton japawi xael wut, nejchaxoelaxaelon: “Xan babijax isx Diosliajwa, xaelx xot japawi” —chiyaxaelon, nejchaxoel wut. **11-12** Xamal chiekal matabijam, japawi pachaem jiw xaeliajwa. Japawi xaelam wut, ja-am wut, asew jiw, chiekal xanaboeja-elpifuk Dios, japibej xaeyaxael japawi. Samata, kaes pejme pachaem xamal xae-elaliajwam japawi, japi jiwbej xaesamata japawi. Xamalkalliajwa Cristo tupa-el. Japiliajwabej Cristo tup. Xamal xaeyaxaelam wut japawi, japibej xaeyaxael wut, ja-aech wut, japi nejchaxoelaxael: “Xan isx babijax Diosliajwa” —chiyaxaeli, nejchaxoel wut. Ja-aech wut, xamal isaxaelam babijax Cristoliajwa. **13** Samata, xan nejchaxoelx: “Xan xaelx wut japawi, asew jiw, naexasiti Jesús pejwujajan, xaeyaxaelbej japawi. Do jawux, japi nejchaxoelaxael: ‘Xan Diosliajwa babijax isx, xaelx xot japawi’ —chiyaxaeli, nejchaxoel wut” —an xan, nejchaxoelx wut. Samata, kaes pejme pachaem xan japawi xae-elaliajwan, asew naexasiti Jesús pejwujajan xaesamatabej japawi.

**Dios tapaeipox apóstoles wuljoeliajwa Jesús
pejwujajan naexasiti, japi wewe'paspoxanliajwa**

9 Cristo xan namakafit apóstolliajwan. Japonbej xan nato'a jiw naewwujajniajwan, me-ama asew apóstoles, jachiliajwan. Xanbej tajut chiekal taenx wajpaklon Jesús. Xamal naewwujajnix japon pejwujajan. Samata, xamal chiekal naexasitam japon pejwujajan. **2** Asew jiw nakaewa najum-aech xanliajwa: “Pablo Jesucristo pej-apóstola-el” —na-aechi. Xamallax matabijam diachwujajnakolax xan Jesucristo pej-apóstolan. Naewwujajnix wut Jesús pejwujajan, xamalbej naexasitam. Samata, xamal najut chiekal matabijam diachwujajnakolax xan Jesucristo pej-apóstolan.

3 Xan ampox lelaxaelen, asew jiw jum-aech xot asaxan xanliajwa. **4** Xanal apóstoles, Jesús pejiwan, Dios tanbistax xot, japon xanal natapai xamal nachaxduiliajwam naxaeyaxan. **5** Xan tajow fitx wut, Jesús pejwujajan naexasitpow, xanbej tajow buflaeyaxaelen, jiw naewwujajnix wut Jesús pejwujajan. Me-ama asew apóstoles, Pedrobej, wajpaklon Jesús pakoew-bej, japi bu'nanumt pejiwatho', jiw naewwujajan wuti Jesús pejwujajan, xanbej jachiyaxaelen, tajow fitx wut. **6** Asew, naexasiti Jesús pejwujajan, xamal naewwujajan wuti Cristo pejwujajan, japi naxaeyaxan wewe'pas wut, xamal kajachaweatam. Xanlax, Bernabé suapich, tajut nabistax. Xanal koewan ja-anlapax, xamal nakajachawaesamatam. **7** Xamal chiekal matabijam. Aton nabist wut, japon moch pajut naxaeyaxan wujajsliajwa. Soldaw-atonbej pejpaklon chaxduws naxaeyaxan japon xaeliajwa. Nabistponbej uvalul pejpaklonliajwa, japon aton kaectapaeis kaesuapich uva xaeliajwa. Asanbej, oveja tataefulpon, japonbej pejpaklon kaechafias-esal, leche sae'a wut mat-uffeliajwa. **8-9** Nejchaxoelam wut, jnabej nejchaxoele': “Pablo pajut pejnechaxoelaxtat japox faen jumchiliajwa” —nabej aeche', nejchaxoelam wut! Moisés chajia lelpox jum-aech: “Woei xanbistam wut trigo matbokanaliajwa, jwoei bozal nabej kaechxoele' trigo xaeliajwa!” —aechox. Moisés chajia lelpox woeliajwakal japox lela-elon. **10** Moisés chajia lelpox nakjum-aech xatis chiekal matabijaliajwas, naktanbistpi chiekal mosliajwas. Sat xawawakanpon paklonliajwa trigo pelaliajwa, nabist wut, nejchaxoelon: “Asamatkoi trigo foel wut, tajpaklon

kaesɤapich trigo nachaxdusaxael namosliajwa tanbistaxpox” —aechon, nejchaxoel wɤt. Trigo matbokkiyanpi nejchaxoel-bej: “Trigo matbokkiyanax kitoetx wɤt, tajpaklon kaesɤapich trigo nachaxdusaxael” —aechi, nejchaxoel wɤt. Do jawɤx, kaenanɤla chaxduwspi, trigo matbokkiyanax toet wɤt. **11** Xamal naewɤajnaj wɤt Jesús pejwɤajan, ja-an wɤt, japawɤajan, me-ama mɤthax nejmatpɤatanxot. Samata, pachaem xamal xanal nakajachawaesliajwam, nawewe'p wɤt. **12** Xamal kajachawaetam asew, japi xamal naewɤajan wɤt Jesús pejwɤajan. Kaes pejme pachaemaxael xanal matxoela nachaxduiliajwam, japi chaxdui-emil wɤtfɤk japoxan.

Dios natapaei xanal japoxan xamal nachaxduiliajwam, Jesús pejwɤajan naewɤajnaj wɤt. Pe nakiowa, xamal wɤljoe-enil nachaxduiliajwam. Xanallax tajut nabistax natataeflaliajwan. Xanal wɤljowx wɤt, xamal nejchaxoelam wɤt, asax nejchaxoelaxaelam xanalliajwa. Ja-an wɤt, xamal naexaxisaximil naewɤajnajpox Jesús pejwɤajan. **13** Xamal chiekal matabijam. Dios pejtemplobatata nabistpi, japi xaeyaxael naxaeyaxan, Dios pej-ofrendapi. Altarxot nabistpi, japi choef xɤa'at wɤt Dios pej-ofrendaliajwa, japibej xaeyaxael japawi, wediajkaswi japiliajwa. **14** Ja-aechbej, asew Jesucristo pejwɤajan naewɤajan wɤt. Wajpaklon Jesucristo japi tapaeis chaxduiliajwas, naxaeyaxan wewe'pas wɤti. **15** Xanbej wajpaklon Jesucristo natapaei xamal nakajachawaesliajwam, naxaeyaxan nawewe'p wɤt. Pe nakiowa, xamal wɤljoe-enil nakajachawaesliajwam. Ampacarta lela-enilbej xamal wɤljoeliajwan kajachawaesax. Xan nejxasinka-enil xamal wɤljoeliajwan naxaeyaxan xan xaeliajwan. Xanliajwa, kaes pejme pachaem tajlit tɤpaliajwan.

16 Xan asew Jesús pejwɤajan naewɤajnaj wɤt Dios bɤ'welialjwas, nejchaxoelx wɤt, nejchaxoela-enil: “Xan kaes pejme pachaeman. Me-ama asew jiw, jachi-enil” —chi-enil, nejchaxoelx wɤt. Wajpaklon Jesucristo nato'a jiw naewɤajnalialjwan japon pejwɤajan. Japawɤajan jiw naewɤajnajxinil wɤt, asamatkoi Dios wɤajnalelan wɤt, japox xabich pachaemaxil xanliajwa. **17** Xan tajut tajaxtat naewɤajnaj wɤt, ja-an wɤt, wɤajnawesaxaelen jiw xan namosliajwa. Pe xan tajut tajaxtat naewɤajna-enil japawɤajan. Xan jiw naewɤajnafɤlax japawɤajan, wajpaklon Dios nato'a xot. **18** Dios natapaei xan jiw namosliajwa, naewɤajnaj wɤt. Pe nakiowa, xan jiw naewɤajnaj

wut Jesús pejwujajan japi Dios bu'welijawas, xan mat-omwuljoe-enil. Nejchachaemlax wut, japox nejchachaemlax, me-ama xan jiw namot wut, ja-an.

19 Xan esclavo-enil. Malech nabistpona-enil puexa jiwlijawa. Pe nakiowa, me-ama esclavo wut, ja-an. Puexa jiw malech naewujajna x Cristo pejwujajan japi jiw naexasislijawa. **20** Diachwujajnakolax xan nawewe'pa-el naexasislijawan Moisés chajia lelpox, naexasitx xot Jesucristo pejwujajan. Pe xan judíosxotx wut, me-ama Moisés chajia lelpox naexasitx wut, ja-an, japi judíosbej naexasislijawa Cristo pejwujajan. **21** Judíos-elpi Moisés chajia lelpox naexasis-el. Samata, xan japixotx wutbej, Moisés chajia lelpox naexasis-enil wut, ja-an judíos-elpiwej naexasislijawa Cristo pejwujajan. Ja-an wut, xan kofs-enil Dios pejjamechan naexasitxpxox. Naexasisfulax, me-ama wajpaklon Jesucristo nato'a. **22** Jiw, jelnaexasiti Jesús pejwujajan, japi chiekal xanaboeja-elfuk Dios. Samata, xan japixotx wut, me-ama japi, ja-an, japiwej chiekal naexasislijawa Cristo pejwujajan. Xan puexa jiw naewujajna x wut, isfulax, me-ama japi, japiwej chiekal naexasislijawa Jesús pejwujajan Dios bu'welijawasbejpi. **23** Xan ja-an japixotx wut, puexa jiw chiekal naexasislijawa Cristo pejwujajan Dios bu'welijawas. Samata, Dios xan nakajachawaesaxael wut, kajachawaesaxaelbejpon japi jiw, me-ama Dios chajia jum-aech kajachawaeslijawa.

24 Xamal chiekal matabijam, puexa jiw xabich dukp kanaliajwa premio. Pe japixot kaen, matxoelapatpon, japon premio kana. Xamalbej ja-am, Dioslijawa xabich nabistam wut. **25** Dukpaxaelpi premio kanaliajwa, kaenanula chiekal nejchaxoel xabich najaeslijawa, me-ama a sew, jachi-elaliajwa. Samata, dukpaxaelpi pajut chiekal natataeful kanaliajwa premio, nuf-ufacorona. Japox corona piachlijawa-el, selnaxaes xotox. Xatis Dioslijawa xabich nabistas kanaliajwas Dios pijax premio. Japox premiolax pomatkoichaliajwa. **26** Me-ama aton matnoch xabich najaet markasxot paslijawa, xan jachiyaxaelen. Puexa tajpamamaxtat isaxaelen. Me-ama wajpaklon Dios nato'a, jachiyaxaelen. Ja-an wut, japonlijawa tanbistaxpoxan, kaeyax, nawenafo'axil. **27** Samata, tajut chiekal natataeflax babijax isasamatan. Jasox isx tajpaklon, Jesús, nejchachaemlaliajwa, xan jiw naewujajna x wut japon pejwujajan. A sew naewujajna x

wut Jesús pejuwajan, japamatkoiyan xan chiekal duka-enil wut, Dios pajut xan nato'axael kofsliajwan japon pijax bichax.

**Pablo fiatpox Corinto paklowaxpijiw
ídolos kawuajnasamata**

10 Takoew, xan naewuajna xamal nejkiowasamatam. Wajwuajnapijiw nakola wuti Egipto tuajnu xot, japi fulafol Moisés. Jawut itloejen athu dukaful japi pejuwajnalel. Samata, japi japox, itloejen, fulafol. Do jawut, Dios japi kaja-chawaech likaliajwapi Mar Rojo. **2** Jiw bautisas wut, bautisas mintat. Ja-aech wut, japi Dios pejjiw. Jatislap-is wajwuajnapijiw, fulafol wuti itloejen, Moisés suapich. Fulaechbejpi Mar Rojo poxade, min najupanadijan poxade, likaliajwa we-enlede. Ja-aech wut, puexa israelitas Diosliajwa, me-ama bautisas wut, ja-aechi. Ja-aech wut, japi jiw Dios pejjiwlisi. **3** Japibej kaeyax naxaeyax xael pomatkoicha, Moisés suapich. Pejnaxaeyax fulaloeka athulelsik. **4** Puexa japibej kaemin afpi, Dios chaxduchmin, nakolamin ia'botxot. Samata, japa-ia'bot, Cristo wut, ja-aech, israelitas wia xot, tupsia wuti minsit. **5** Pe nakiowa, xabich jiw japixot is Dios nejxasinka-elpoxan. Samata, japi xabich tup, pajilaxtat wuti.

6 Puexa israelitas japox wejatis, xatisbej isasamatas babijaxan. **7** Samata, xamal nabej kawuajne' ídolos! Me-ama asew tajwuajnapijiw, inabej ja-aech! xamal! Dios pejjamechan, chajia lelspx, jum-aech wut, jum-aechox japiliajwa: “Jiw is wut fiesta ídolosliajwa, chalak xaeliajwa, feliajwabej. Do jawux, kachatoel wut, nanapi nababoelaliajwa” —aechox. **8** Xatis nabej bu'moejstis asew watho! Me-ama asew tajwuajnapijiw, inabej jachitis! Tajwuajnapijiw japox is wut, kaematkoí tup veintitres mil jiw, Dios kastikas xoti. **9** Me-ama asew tajwuajnapijiw, japi is babijaxan Dios palalaliajwa, xatislax japox jachiyaxisal. Tajwuajnapijiw asbuan jumch babijax is wut, japixot xabich jom liklas. Do jawut, chatupbejpi jom liklaspoxan. **10** Asew tajwuajnapijiw jum-aech babejjamechan Diosliajwa. Ja-aech wut, Dios to'a ángel japi beliajwas. Samata, xamalbej nabej jum-aech! babejjamechan Diosliajwa!

11 Tajwuajnapijiw japoxan wejatis, xatis wachakalpijwas-bej nejchaxoelasamatas babijaxan isliajwas. Japoxanliajwa Dios pejjamechan, chajia lelspx, jum-aech wut, jum-aechox

xatis chiekal matabijaliajwas isasamatas babijaxan. **12** Jesús pejwúajan naexasitpon, nejchaxoel wüt: “Xan chiekal naexasitx Jesús pejwúajan. Diachwúajnakolax babijax isaxinil” —aech wüton, nejchaxoel wüt, japon pajut chiekal natataeflaxael, asamatkoi babijax isasamata. **13** Xamal matabijaxaelam. Satanás xamal xapaeja wüt babijaxan isliajwam, xamal koewam japon xapaejaxil. Asew, Jesús pejwúajan naexasitibej, xapaejaxaes. Satanás xatis nakxapaeja wüt, Dios nakiowa nakkajachawaesaxael babijaxan isasamatas. Me-ama Dios chajia jumdut nakkajachawaesliajwa, jachiyaxael Dios xatishliajwa. Samata, Satanás xamal xapaeja wüt, Dios kajachawaesaxael kaes mamnikaliajwam Dios xanaboejampoxliajwa. Ja-am wüt, babijax isaximil.

14 Samata, xamal takoew, nejxasinkaxpim, ¡nabej kawúajne' ídolos! **15** Xamal chiekal matabijam. Chiekal nejchaxoelam-bej. Samata, nejchaxoelam wüt, ¡chiekal nejchaxoelde chiekal matabijaliajwam xan jum-anpoxan, japoxan diach chiekal wúajnakolax wüt, o, japoxan diachwúajnakolaxa-el wüt! **16** Xatis Santa Cena xaes wüt, japox nejchaxoelaliajwas, wajpaklon Jesucristo suapichaspo. Jawüt, vino afs wütbej, nejchaxoelaliajwas Cristo tuppox cruztat xatishliajwa. Panbej jalkas wüt xaeliajwas, japox nejchaxoelaliajwas, Cristo boesaspo xatis nakbú'weliajwa. **17** Xatis, Jesús pejwúajan naexasichpis, xabich pin-iach. Pe nakiowa, kaeyax panax xaes. Samata, xatis, Cristo suapich, kaebú'tas.

18 ¡Chiekal nejchaxoelde judíosliajwa! Japi choef xúa'at wüt ofrenda isliajwa Diosliajwa, japi japawi xael wüt, chiekal kaenejchaxoelax Diosliajwa. **19** Xan lelx wüt, jumchi-enil: “Ídoloslap Dios” —chi-enil. Xan jumchi-enilbej: “Pawi ídolosliajwapi, kaes pejme pachaem, asawi ídolosliajwaelwi, jachi-el” —chi-enil. **20** Jiw, naexasis-elpi Dios pejjamechan, choef xúa'at wüt ofrenda isliajwa ídoliajwa, japi jiw nejchaxoel: “Ampawi chaxdutx ofrenda ídoliajwa” —aechi, nejchaxoel wüt. Diachwúajnakolax ídoliajwael. Japi choef xúa'at depliajwa. Japawibej Diosliajwael. Samata, xan nejxasinka-enil xamal isliajwam japox ofrenda, japi jiw suapich. **21** Xamal Santa Cena xaelam wüt, vino afambej nejchaxoelaliajwam Jesucristo tuppox. Asew jiw, Dios pejjamechan naexasis-elpi, fiesta is wüt ídolosliajwa,

japafiesta depliajwa. Samata, ¡xamal japi jiw sʉapich, nabej xae! ¡Nabej fe'bej, japi jiw sʉapich!

22 Xatis nejxasinka-esal babijax isliajwas wajpaklon Jesús palalasangata, japon kaes pejme mamnik xot. Me-ama xatis, jachi-elon.

Chiekal duilaxaelpox Jesús pejwʉajan naexasiti

23 Asew jiw jʉm-aech: “Majt nafiatpoxan, amwʉtjel japoxan chiekal toep. Samata, xan na-it-ele-el. Isasianpoxan isaxaelen” —aech asew jiw asbʉan jʉmch. Japi jʉm-aechpox diachwʉajnakolax. Pe puexa japi isasiapoxan, is wʉti, japoxan pachaemaxil kaes xanaboejalaiajwapi Dios. **24** Nejchaxoelam wʉt, ¡nabej nejchaxoele' pachaempoxan isliajwam najutliajwakal! Pelax nejchaxoelde isliajwam pachaempoxan asew jiwliajwa.

25 Pawi mowaxot wʉajtam wʉt, japawi nejmach xaeya-xaelam. Japawi xaelam wʉt, pachaem Diosliajwa. Samata, pawi mowaxot wʉajtam wʉt, nabej wʉajnachaems: “¿Ampawikat ofrenda ídolosliajwawi?” —nabej aeche!. Pawi mowapi xamal wʉajnachaemtam wʉt, jʉmnosaxaeli: “Diachdo', ampawi, ofrenda ídolosliajwawi” —chiyaxaeli xamalliajwa. Japox jʉmtaenam wʉt, nejchaxoelaxaelam: “Japawi xaelx wʉt, Diosliajwa japox pachaemaxil” —chiyaxaelam, nejchaxoelam wʉt. Samata, pawi wʉajtam wʉt, ¡nabej wʉajnachaems! **26** Ampathat, puexa ampathatatpibej, japoxan wajpaklon Dios pejew. Samata, pachaem xatis xaeliajwas japawi.

27 Jesús pejwʉajan naexasis-elpon, xamal tadʉt wʉt xaeliajwam, ¡nejmach xaem! Xaeliajwam wʉt, ¡nabej wʉajnachaems: “¿Ampawikat, ofrenda ídolosliajwawi?” —nabej aeche! **28** Pe jawʉt, asan, Jesús pejwʉajan naexasitpon, jʉm-aech wʉt: “Ampawi xaes wʉt, Diosliajwa pachaemaxil” —aech wʉton, ¡xamal nabej xae' japawi! Pe nakiowa, xamal japawi xaelam wʉt, diachwʉajnakolax japon aton tabejsaxaelam. **29** Xamal chiekal matabijam, puexa pawi pachaem xaeliajwas. Pe nakiowa, asew jiw jʉm-aech wʉt japawiliajwa: “Pachaema-el ampawi xaeliajwas” —aech wʉti, ¡xamalbej nabej xae' japawi!

Asan, Jesús pejwʉajan naexasitpon, xan jʉm-anpox jʉmtaen wʉt, japon asbʉan jʉmch jʉmchiyaxilbej: “Dios natapaei xaeliajwan ofrenda ídoliajwawi. Samata, xan nejmach chiekal xaelx. ¿Ma-aech xotkat majt xaelxpropan

wulkaechakoftax?” —chiyaxil japon aton. **30** Xan xaeliajwan wut, gracias-an Diosliajwa. ¿Ma-aech xotkat asan aton asbuan jumch jumchiyaxael xanliajwa: “Japon pejbu'wujajan Diosliajwa, xael xoton japawi, ofrenda idololiajwawi” —nachi-yaxaelkat? **31** Puexa isaxaelampoxan, xaeyaxaelampoxanbej, feyaxaelampoxanbej, puexa japoxan isam wut, ¡chiekal isde, puexa jiw Dios sitaeliajwa! **32** Samata, ¡xamal nabej is babijaxan nakxataesamata, tabejsasamatambej, judíos, judíos-elpipej, asew, Dios naexasitibej! **33** Puexa xan isxpoxan, isx puexa asew jiw nejchachaemlaliajwa. Isx wut pachaempoxan, nejchaxoela-enil: “Ampoxan xan tajutliajwa” —chi-enil, nejchaxoelx wut. Japoxan xan isx puexa asew jiw wepachaemaliajwas. Japox nejchaxoelx, nejxasinkax xot japi jiwbej Dios bu'welijašwas.

11 Xan isfulax Cristo isfulpoxan. ¡Xamalbej japoxan isfulde!

Machiyaxaelpox watho', cultoxot wut

2 Takoew, xamal nejchaxoelam xanliajwa. Xan jum-anpoxanbej xamal naexasisfulam. Samata, xan xabich nejchachaemlax xamalliajwa. **3** Xan jum-an xamal chiekal matabijaliajwam ampox. Dios paklon Cristoliajwa. Cristobej paklon kaenanula poejiwliajwa, japi naexasiti japon pejwujajan. Kaenanula poejiwbej paklochow pejwatho'liajwa. **4** Samata, aton matlua't wut panuelbu', Dios kawujajnalijašwa wut, o, Dios buxto'aspox jiw naewujajnalijašwa wutbej, ja-aech wut, wajpaklon Jesucristo padalaxael japon atonliajwa. **5** Kaeow pawis Dios kawujajnalijašwa wut, o, Dios buxto'aspox jiw naewujajnalijašwa wutbej, matlua's-el wut panuelbu', ja-aech wut, pamal padalaxael pijowliajwa, japow, me-ama ta'laxaxoch wut, jachiyaxael xotow pamalliajwa. **6** Pawis nejxasinka-el wut panuelbu' matlua'sliajwa, ja-aech wut, pajut nata'laxaxosaxaelpow. Pe nejxasinka-el wut pajut namatfunaliajwa, o, pajut nata'laxaxosliajwa ta'dalasangata, ja-aech wut, ¡nej matlua's panuelbu'! **7** Dios is wut aton, me-ama Dios pajut wut, ja-aech japon aton. Samata, poejiw matlua'axil panuelbu'. Japi chiekal pachaem wut, puexa jiw nejchaxoelaxael Diosliajwa: “Dios xabich pachaem” —chiyaxael jiw, nejchaxoel wut. Atow chiekal pachaem wutbej, puexa asew jiw nejchaxoelaxael japow pamalliajwa: “Ampow pamal xabich pachaem” —chiyaxael asew jiw,

nejchaxoel wut japowliajwa. **8** Dios aton is wut, kus-elon pawis pejchena. Dioslax kut aton pejchena isliajwapon pawis. **9** Dios aton is wut, is-elon japon aton kajachawaesliajwa pawis. ¡El! Dios is pawis, japow kajachawaesliajwa japon aton. **10** Samata, atow matlua'saxael panuelbu', naexasiti Jesús pejuwajan natamejabat wut. Do ja-aech wut, Dios pej-ángeles nejchaxoelaxael japowliajwa: “Diachwujnakolax ampow pawis pamal chiekal sitaen” —chiyaxael Dios pej-ángeles japowliajwa. **11** Xatis, naexasichpis Jesús pejuwajan, chiekal matabijas. Watho' chiekal jil wut, xatis poejiwas, machiyaxisal. Watho'bej machiyaxil, poejiw chiekal jil wut. **12** Dios is wut atow, aton chenakuton atow isliajwapon. Do jawux, poejiw nalaela watho'xot. Dios pijaxtat japox ja-aech.

13 Xamal najut nejchaxoelam wut, ¡chiekal nejchaxoelde ampoxliajwa! Jesús pejuwajan naexasitampim natamejam wut natamejabatat, ¿pachaemkat pawis matlua's-elaxtat Dios kawujnaliajwa? ¡El! Japox chiekal pachaema-el. **14** Wajut chiekal matabijas. Poejiw matlatapaei wut kasnikaliajwa, japox xabich padalapox. **15** Watho'lax matlakasnik wut, japox pachaem japi watho'liajwa. Pe Dios jasox chajia tapaei watho' matlakasnikaliajwa, japow pejmatlatat, me-ama matnaematakach wut, jachiliajwaspow. **16** Kaen aton naexasis-el wut xan jum-ampox, japon matabijsaxael xanal kaenejchaxoelaxanpox, asew jiw suapich, naexasiti Jesús pejuwajan, matlakasnikpoxliajwa.

Santa Cena xael wut, asew jiw xabich xaelpox

17 Xan lelx wut, lela-enil xamal jumchiliajwan ampox: “Santa Cena xaelam wut, chiekal isam” —chiliajwan. ¡El! Xamal natamejlam wut Santa Cena xaeliajwam, chiekal is-emil. **18** Xamal natamejlam wut Santa Cena xaeliajwam, chiekal kaenejchaxoelaxa-emil. Asbuan jumch xamal nasalam, Santa Cena xaeliajwam wut. Japoxliajwa asew jiw xan nachapaei xamal ja-ampoxan. Jawut xan nejchaxoelx: “Japox diachwujnakolax bej ja-aechbej” —an xan, tajut nejchaxoelx wut. **19** Xamalxot asew nakaewa najum-aech: “Xatis kaes pejme naexasich Jesús pejuwajan. Me-ama asew xatisxot, jachi-esal. Samata, wajlel chalakaxaes” —aechi nakaewaliajwa. **20** Samata, natamejlam wut nejchaxoelaliajwam wajpaklon Jesucristoliajwa, japox Santa Cena Jesucristoliajwa-el. **21** Santa Cena xaelam wut,

xamal najut matxoela xaelam xapatampoxam, naxaeyaxan. Xamal asew jiw xasala-emil. Asew jiw xamalxot xabich af wut, saxtas. Asew jiw lax, kijilpi, nejmütpijwa-elpi, japi kaechkow. Litaxaelapi. **22** ¡Xamal jasox nabej ja-aeché! Asamatkoi, Santa Cena xaeliajwam wut, fúlaeliajwam wut, xamal xabich litaxaelam wutbej, ¡nejbachantat majt cha-aex xaem! ¡Fembej! ¿Ma-aech xotkat sitae-emil asew jiw, naexasiti Jesús pejwúajan, pat wut Santa Cena xaeliajwa? Asew xamalxot, kijilpi, japi xamal xabich datam. Xamal japoxan isam wut, pachaema-el japiliajwa. Samata, xan nejchachaemla-enil xamalliajwa, japox wultaenx wut.

Jiw Santa Cena xael nejchaxoelaliajwa Jesús tūppox

(Mt 26.26–29; Mr 14.22–25; Lc 22.14–20)

23 Xamal chajia chiekal chanaekabuanax Santo Cena-liajwa, xan matabijtaxpoxan Cristoxot. Wajpaklon Jesús, pejnachala swapich, madoi xael wut Santa Cena, jawut panax fiton. Japamadoi, kaen pejnachalan wiasaxaeson padaelmajiw-xot. **24** Do jawut, Jesús panax fit wut, pax Dios kawúajan wut, gracias-aechon. Jawut panax jalkafulon. Jawut jum-aechon pejnachalaliajwa: “Ampox panax, tajwit wut, ja-aech. Asamatkoi, xamal xaelam wut Santa Cena, kaenanula nejchaxoelaliajwam xan isxpoxliajwa” —aech Jesús pejnachalaliajwa, bu'xael wut Santa Cena. **25** Do jawux, xaeyax kaechatoel wut, Jesús vinomint chafit wut, jum-aechon: “Ampot vinomint, me-ama tajjal wut, ja-aech. Diachwúajnakolax Dios chajia jumdut bu'weliajwa tajjal pijaxtat makanotxpi. Samata, Santa Cena xaelam wut, xamal nejchaxoelaxaelam xan tūpxpox xamalliajwa” —aech Jesús pejnachalaliajwa. **26** Samata, xamal Santa Cena xaelam wut, jawut asew jiw japox taen wut, nejchaxoelaxael wajpaklon tūppox. Xamal japox isfulaxaelam, hasta wajpaklon Jesús pejme pask wut.

Jiw chiekal nejchaxoelaxaelpox Santa Cena xael wut, chiekal nejchaxoelaliajwa wajpaklon tūppoxliajwa

27 Jiw natamejal wut Santa Cena xaeliajwa, jawut chiekal nejchaxoelaxaelpi wajpaklon tūppoxliajwa. Japox chiekal nejchaxoela-el wuti, babijax isaxael, sitae-el xoti wajpaklon tūppox japiliajwa. **28** Samata, pan xaeliajwa wut, vino feliajwa

wutbej, jawut kaenanula jiw chiekal nejchaxoelaxael. Jawutbej, jiw pejbu'wujajan wut Diosliajwa, japoxliajwa Dios kawujanaxaeli Dios beltaelajwas. Do ja-aech wut, pachaem japi xaeliajwa pan, feliajwabejpi vino. **29** Pe masoxtat asbuan jumch jiw pan xael wut, af wutbejpi vino, majt chiekal nejchaxoela-el wut wajpaklon tuppoxliajwa cruztat jiwliajwa, japi jiw pejbu'wujanaxael Diosliajwa. Kastikaxaesbejpi Dios. **30** Samata, jasoxtat xamalxot xabich jiw bu'xaenk. Asew chiekal mamnika-elbej. Asew tupbej, sitae-el xoti Santa Cena. **31** Xatis kaenanula wajut chiekal nejchaxoelaxaes wut babijax isaspoxanliajwa, japoxan kofas wutbej, jatis wut, wajpaklon nakkastikaxil. **32** Xatis babijaxan isaspoxan kofa-esal wut, jatis wut, wajpaklon nakkastikaxael xatis babijaxan kofaliajwas. Jasoxtat Dios nakbu'weyaxael nakpelsasamatas, Jesús pejwujajan naexasis-eli suapich.

33 Takoew, xamal natamejlam wut Santa Cena xaeliajwam, asew jiw pas-el wutfuk, ¡wujajnawe'e! Puexa jiw pat wut, do ja-aech wut, ¡naxaem kaeyaxtat! **34** Natamejlax wujajna, asew xamalxot xabich litaxaela wut, japi pejbachantat majt naxaeyaxael. Japi jachiyaxael, asew jiw kaechkawasamata natamejlamxot, Dios kastikasamatas japi jiw. Xamal kaes asaxanliajwa majt nawujajnachaemtam. Jelow japox tajut chiekal chanaekabuanalax, paslax wut xamalxot.

Espíritu Santo kajachawaesfulaspox Jesús pejwujajan naexasiti Dios tato'alpox isfulaliajwa

12 Takoew, lelaxaelen xamal chiekal matabijaliajwam. Kaenanula naexasiti Jesús pejwujajan, japi jiw Espiritu Santo kajachawaesfulas Dios tato'alpoxan isfulaliajwa.

2 Xamal chiekal matabijam. Majt naexasis-emil wutfuk Jesús pejwujajan, Satanás xamal naekichachajbaful. Samata, ídolos, naksiya-elpoxan, xamal kawujajnam. **3** Samata, xan nej-xasinkax xamal chiekal matabijaliajwam. Aton jum-aech wut babejjamechan Jesúsliajwa, japon pejmatpuxatxot jil Espiritu Santo. Asan aton jum-aech wutlax: “Jesús tajpaklon” —aech wut, japon pejmatpuxatxot Espiritu Santo duk.

4 Jesús pejwujajan naexasiti kaenanula nabist asabichaxan, Dios pejbichaxan. Espiritu Santobej kajachawaesfulas japi jiw Dios tato'alpoxan isfulaliajwa. **5** Japi jiwbej kaenanula chiekal nabist Diosliajwa. Japi pejbichaxan kaenanula najupa-el. Pe

japi jiw nabist kaen wajpaklon Diosliajwa. **6** Japi jiw kaenanula asabichaxan nabist, Dios pejbichaxan. Samata, Dios puexa japi jiw kaenanula kajachawaesful chiekal isfulaliajwa japon pejbichaxan. **7** Jesús pejwujajan naexasiti, japi jiw kajachawaesfulas Espíritu Santo chiekal isfulaliajwa Dios pejbichaxan, puexa asew, naexasiti Jesús pejwujajan, wepachaemaliajwas japoxan. **8** Asew Jesús pejwujajan naexasitixot kajachawaesfulas Espíritu Santo. Samata, japi naewujajan wut, asew jiw chiekal naewechpi. Do ja-aech wut, japi jiwbej chiekal duilaful. Asew jiw, naexasitpixot Jesús pejwujajan, Espíritu Santo kajachawaesfulas xot, japi jiw xajup chiekal chanaekabuanaliajwa asew jiw chiekal matabijaliajwa japajamechan. **9** Asew Jesús pejwujajan naexasitixot, Espíritu Santo kajachawaesfulas xot, japi jiw chiekal xanaboejapi Dios. Asew naexasitpixot Jesús pejwujajan, Espíritu Santo kajachawaesfulas xot, japi jiw xajup, jiw bu'xaenk wut boejthusliajwa. **10** Asew naexasitpixot Jesús pejwujajan, Espíritu Santo kajachawaesfulas xot, japi jiw xajup koechaxan isliajwa. Asew naexasitpixot Jesús pejwujajan, Espíritu Santo kajachawaesfulas xot, japi jiw xajup jiw naewujajnalijwa Dios buxto'aspoxan. Asew naexasitpixot Jesús pejwujajan, Espíritu Santo kajachawaesfulas xot, japi jiw xajupaxael matabijaliajwa, asew jiw jum-aech wut Espíritu Santo buxto'aspoxan, o, dep buxto'aspoxanbej. Asew naexasitixot Jesús pejwujajan, japi jiw Espíritu Santo kajachawaesfulas xot, xajupaxael naksiyaliajwa asajame, japi majt matabija-eljame naksiyaliajwa. Asew naexasitixot Jesús pejwujajan, japi jiw Espíritu Santo kajachawaesfulas xot, xajupaxael jummatbijaliajwa, asew jiw naksiya wut asajame. Do jawux, japi jiw xajupaxaelbej asew jiw chiekal chanaekabuanaliajwa japajame jum-aechpoxan. **11** Puexa japi jiw, Jesús pejwujajan naexasitixot, japoxan ja-aech, Espíritu Santo japi kajachawaesfulas xot. Espíritu Santo kaenanula jiw kajachawaet, me-ama japon nejxasink jiw kajachawaesliajwa.

Kaebu'tpox Cristo suapich naexasiti Jesús pejwujajan

12 Aton pejbu'txot xabich pathi, pawibej. Kaes asewbej. Pe nakiowa, kaebu't. Jatisbej xatis, Jesús pejjjws. Xabichas. Pe nakiowa, kaebu'tas, Cristo suapich. **13** Puexa xatis nakbautisa kaemutaliajwas. Dios to'a kaen Espíritu Santo

wajmatpɥatanxotaliajwa. Xanal judíos-pin, xamal judíos-emilpimbej, xanal esclavos-enilpin, xamal esclavospimbej, puexa xatis wajmatpɥatanxot kaen Espíritu Santo.

14 Kaenanɥla wajbɥ'antat, xabich pathi, pawibej. **15** Aton pejtɥak naksiyaxael wɥt, jɥmchiyaxilpox: “Xan ke-e-enil. Samata, xan ampabɥ'tpijaxa-enil” —chiyaxil tɥakliajwa. Tɥak japox jɥmchiyaxael wɥt, japox pachaemaxil, japabɥ'tpijax xot. **16** Aton pejnaecho'tbej naksiyaxael wɥt, jɥmchiyaxilbejpox: “Xan itfuta-enil. Samata, xan ampabɥ'tpijaxa-enil” —chiyaxilbej naecho't. Naecho't japox jɥmchiyaxael wɥt, japox pachae-maxil, japabɥ'tpijax xot. **17** Japon pejbɥ't puexa itfukal wɥt, jɥmtaeyaxilon. Puexa pejbɥ'txot naecho'ankal wɥtbej, japon aton jaenxataeyaxil. **18** Samata, Dios aton is wɥt, nejmach puexa ispon, pathiliajwa, pawiliajwabej, kaes asaxanliajwabej pachae-maliajwa. **19** Aton pobɥ'ta itfukal chanlaelt wɥt, o, naecho'ankal chanlaelt wɥtbejpon, ja-aech wɥt, japon aton pejbɥ't ajilaxael. **20** Diachwɥajnakolax aton pejbɥ'tat xabich pathi, pawibej, kaes asaxanbej. Pe nakiowa, japon aton kaebɥ't.

21 Aton pej-itfut naksiyaxael wɥt, jɥmchiyaxil ke-eliajwa: “Ke-e, xam nawewe'pa-el” —chiyaxil itfut ke-eliajwa. Aton pejmatnaetbej naksiyaxael wɥt, jɥmchiyaxil tɥakliajwa: “Tɥak, xam nawewe'pa-el” —chiyaxil matnaet tɥakliajwa. **22** Puexa xatis wajbɥ'antatpi xabich pachaem. Nejchaxoels wɥt wajbɥ'antatpiliajwa, me-ama nakwewe'pa-el wɥt, jatis japoxanliajwa. Pe japoxan diachwɥajnakolax ajil wɥt wajbɥ'anxot, xabich nakwewe'paxael japoxan. **23** Xatis chiekal naxoeis wajdalapoxanxot, nejchaxoels xot: “Pachaema-el, asew jiw nabɥ'taeliajwa” —tis xot, nejchaxoels wɥt. **24** Pe wajmɥax, wajthitbej, wajmatnaetbej, pachaem asew jiw nakwetaeliajwa. Samata, jaxot naxoe-esal. Dios is wɥt wajbɥ'an, wajbɥ'anxot asaxan, me-ama xatis nakwewe'pa-el wɥt, ja-aech japoxan. Jaxot chiekal naxoeis wɥt, jatis wɥt, japoxan, me-ama xatis-xot nakwewe'p wɥt, jachiyaxael. **25** Wajthit, wajwibej, kaes asaxanbej, wajbɥ'antat nasalaxil. Japoxan kaenanɥla wajbɥ'antat chiekal nakaewa natataeflafɥl. **26** Nakwexaenk wɥt wajbɥ'anxot, pobɥ'ta chiekal pachaema-esal. Do jawɥx, xaenkpox boejkijil wɥt, ja-aech wɥt, chiekal pejme nejchachaemlas.


27 Kaenanɥla xamal, puexa Cristo pejbɥ'tam wɥt, ja-am. **28** Samata, xamal kaenanɥla Dios chaxduw asabichaxan. Dios

matxoela makanot asew jiw, japi Jesús pej-apóstolesliajwa. Do jawux, makanoton asew jiw profetasliajwa, japi asew jiw naewuajnalijwa, me-ama Dios buxto'as. Makanotbejpon asew jiw chanaekabuñanapilijwa japon pejjamechan. To'abejpon asew jiw koechaxan isliajwa. To'abejpon asew jiw, bu'xaenkpi boejthusliajwa. To'abejpon asew jiw, japi kajachawaesliajwa asew jiw. To'abejpon asew jiw, japi paklochowliajwa Jesús pejuwajan naexasitilijwa. To'abejpon asew jiw chalechkal asajamechan naksiyalijwa, japi majt naksiya-eljamechan. **29** Puexa jiw apóstoles-el. Puexa jiw profetas-elbej. Puexa jiw chanaekabuñana-piya-elbej. Puexa jiw koechaxan ispiya-elbej. **30** Puexa jiw boejthutpiya-elbej bu'xaenkpi. Puexa jiw chalechkal asajame naksiya-elpibej, majt naksiya-eljame. Puexa jiw jummatbijia-elbej, asew jiw asajamechan naksiya wut chiekal chanaekabuñanaliaw asew jiw. **31** Pachaem, xamal nejchaxoelam wut: “Xan nejxasinkax Dios nachaxdusliajwa pijax bichax, kaes chiekal pachaempox” —am wut.

Nejxasinkaxaespoax asew jiw

Amwut xamal naewuajnaxaelen kaes chiekal pachaempox. Japox nakaewa nanejxasinkaspoax.

13 Xan naksiyaxaelen wut asajametax, ángeles pejjametax-bej, pe asew jiw, xan nanaeweti, nejxasinka-enil wut, asajametax naksiyaxaelen-pox pachaemaxil xanliajwa. Me-ama platillo, o, campana nejmetpox, jiw daka wut, jachiyaxael xan naksiyaxpox japi jiwliajwa. **2** Asew jiw nejxasinka-enil wut, xan Dios nabuxto'apox jiw naewuajnaxaelen wut, japox pachaemaxil xanliajwa. Matabijsaxaelen wutbej maliach Dios matabijtpoxan, japoxbej pachaemaxil xanliajwa, nejxasinka-enil wut asew jiw. Xabich nejmach matabijsaxaelen wutbej, japox pachaemaxil xanliajwa, nejxasinka-enil wut asew jiw. Xan xabich Dios xanaboejsaxaelen wutbej, Dios kawuajnaxaelen wut pinamux nawexalixsliajwa asalel, japamux nawexalixt



(1 Corintios 13.1)

wut, japoxbej pachaemaxil xanliajwa, nejxasinka-enil wut asew jiw. **3** Xan puexa tejew chaxduiyaxaelen wutbej kijila, xan tajut natapaeyaxaelen wutbej asew jiw naboesaliajwa, japoxanbej pachaemaxil xanliajwa, asew jiw nejxasinka-enil wut.

4 Aton, nejxasinkpon asew jiw, japon aton matabijt palalalaliajwa, asew jiw babijaxan isful wut japonliajwa. Japonbej matabijt kajachawaesliajwa asew jiw. Japonbej nusasiowla-el, taen wuton asew jiw pejew. Japon aton pajutliajwa nejchaxoel wutbej, nejchaxoela-elon: “Xan kaes pejme xabich pachae-man. Me-ama asew jiw, jachi-enil” —chi-elon, nejchaxoel wut pajutliajwa. **5** Aton, nejxasinkpon asew jiw, japon aton chiekal pachaembej asew jiwliajwa. Japon nejchaxoel wutbej, nejchaxoela-el faekaliajwa wepachaemspoxan japon pajutliajwaka. Japon aton kamta palala-elbej. Beltaenbejpon asew jiw, japi babijaxan is wut japonliajwa. **6** Aton, nejxasinkpon asew jiw, japon aton nejchachaemla-el, asew jiw babijaxan is wut. Asew jiw is wutlax pachaempoxan, ja-aech wut, japon aton xabich nejchachaemil japoxanliajwa. **7** Aton, nejxasinkpon asew jiw, japon aton nabijat wut, japi jiw babijaxan is wut japonliajwa, japon aton nakiowa nejxasinkaful japi jiw. Palala-elbejpon, japi jiwliajwa babijaxan isful wut japonliajwa. Japon nejchaxoelbej japi jiwliajwa: “Japi jiw asamatkoi bej pachaemaxaelbejpi” —aechon, nejchaxoel wut japi jiwliajwa.

8 Nejxasiyax asew jiwliajwa, japox asamatkoi toepaxil. Asamatkoi profetas baxkofaxael jiw naewuajanpoxan, Dios baxto'aspoxan. Asew jiw chalechkal asajame naksiya wut, matabija-eljame naksiyالياjwa, japibej japox baxkofaxael. Jawutbej jiw pejmatabijsaxan toepaxaelbej. **9** Wajmatabijsaxan xabicha-el. Chiekal puexa matabija-esal. Profetasbej Dios baxto'aspoxan jiw naewuajnalialjwa, japoxbej xabicha-el. **10** Majt puexa chiekal matabija-esalpoxan, puexa xatis Diosxotas wut, jawut japoxan chiekal matabijaxaes.

11 Xan yamxuchan wut, naksiyax, me-ama yamxi naksiya. Nejchaxoelx wutbej, nejchaxoelx, me-ama yamxi nejchaxoel. Matabijtax wutbej, matabijtax, me-ama yamxi matabija. Pelis xan pati'nan wut, nejchaxoela-enil, me-ama yamxi nejchaxoel. **12** Xatis matabijasoxan Diosliajwa xabicha-el. Me-ama chapot, itnasuxanpot, chiekal ithathu'la-el taeliajwas, ja-aechbej xatis matabijasoxan Diosliajwa. Pe asamatkoi, puexa chiekal

matabijaxaes Dios. Me-ama Dios xatis chiekal nakmatabij, jachiyaxaes, xatis chiekal matabijas wut Dios.

13 Dios xanaboejaspox toepaxil. Dios nakjæmdutpox wuajnewesfulaspoxbej, japox toepaxil. Nakaewa nejxasinkaspoxbej toepaxil. Japoxan tresxot, kaes pejme pachaempox, japox nakaewa nanejxasinkaspox.

Espíritu Santo kajachawaetpox jiw naksiyalijwa majt matabija-eljame

14 ¡Xamal kaenejchaxoelde nejxasinkaliajwam a sew jiw! A sew jiw nejxasinkam wut, ¡Dios kawuajande Espíritu Santo xamal kajachawaesliajwa Dios pejbichaxan isliajwam! ¡Kaes Dios kawuajandebej Espíritu Santo xamal kajachawaesliajwa, me-ama Dios buxto'a xamal jiw naewuajnalijwam! **2** A sew jiw Espíritu Santo kajachawaech chalechkal naksiyalijwa, majt matabija-eljame. Japi naksiya japajame Dioskal jumtaeliajwas. Naksiya-eli jiw jumtaeliajwas. Kaen aton jummatabijs-el, japi naksiya wut. **3** A sewlax Espíritu Santo kajachawaech wut, matabijapi jiw chiekal naewuajnalijwa Dios buxto'aspoxan. Ja-aech wut, naexasiti Jesús pejwuajan kaes Dios xanaboejaxaeli. Samata, japi jiw xabich nejchachaemla- xael. **4** A sewbej Espíritu Santo kajachawaech wut, chalechkal naksiyapi majt matabija-eljame, japi kaes Dios xanaboejaxael. A sewlax, Espíritu Santo kajachawaech xot, japi jiw naewuajan Dios buxto'aspoxan Jesús pejwuajan naexasiti, japi jiw kaes xanaboejalijwa Dios.

5 Xan nejxasinkax puexa xamal chalechkal naksiyalijwam majt matabija-emiljame. Pe xan kaes nejxasinkax xamal Espíritu Santo kajachawaesliajwa, a sew jiw naewuajnalijwam xamal Dios buxto'apoxan. Japoxan kaes pejme pachaem. Me-ama chalechkal majt matabija-emiljamechan naksiyampoxan, jachi-el japoxan. Pachaem chalechkal xamal naksiyalijwam majt matabija-emiljamechan. Pe japajamechan naksiyam wut, jawut asan aton chanaekabuanaxael xamal jum-ampoxan, naexasiti Jesús pejwuajan chiekal jummatabilijawajwa. Ja-aech wut, japi kaes Dios xanaboejaxael. **6** Takoew, xamalxot patx wut, chalechkal naksiyaxaelen wut majt matabijs-eniljame, diachwuajnakolax xamal jummatabilijaximil japajame. Ja-aech wut, japox pachaemaxil xamallijwa. Pelax xamalxot

naewuajna x wut wajjemetat Dios nachanaekabuanapoxan, ja-an wut, xamal chiekal najummatajibaxaelam. Ja-aech wutbej, xamal kaes chiekal Dios xanaboejaxaelam.

7 Asew jiw Espiritu Santo kajachawaech xot, chalechkal naksiya majt matabija-eljamechan. Ja-aech wut, kaen japixot jummatabijsaxil japajamechan jum-aechpoxan. Jachiyaxaelbej, kaen aton arpa chiekal daka-el wut. Jiw thiamatabijaxil jajuiliajwa japajajuit. Jachiyaxaelbej, kaen aton toela chiekal nababe-el wut. Jiw thiamatabijaxil jajuiliajwa. **8** Jachiyaxaelbej, kaen soldawan chiekal nababe-el wut trompeta natamejlalijwa soldaw, japon pejmupijiw nabeliajwa, padaelmajiw suapich. Soldaw thiamatabijaxil. Ja-aech wut, thiatadukpaxili natamejlalijwa nabeliajwa, padaelmajiw suapich. **9** Xamal jachiyaxaelam, Espiritu Santo kajachawaet wut chalechkal naksiyalijwam majt matabija-emiljamechan. Xamal naeweti jummatajibaxil, xamal naksiyam wut japajamechan. Asbuan jumch japox nafa'axael. **10** Xabich asajamechan maenk ampathatat. Pe nakiowa, kaejame naksiyapi nospaei wut, chiekal najummatajibaliajwa. **11** Asew jiw asajametat naksiya wut, xan jummatabijsaxiniljame, ja-aech wut, xan nejchaxoelaxaelen japi jiwliajwa: “Ampi jiw bej asatuajnuipijiwbej” —chiyaxaelen, nejchaxoelx wut japiliajwa. Xanbej naksiyax wut asajametat, japibej xan najummatajibaxil. Asbuan jumch nejchaxoelaxaeli xanliajwa: “Pablo, asatuajnuipijinbej” —chiyaxaeli, nejchaxoel wut. **12** Xamal nejxasinkam Espiritu Santo kajachawaetpox kajachawaesliajwam asew, naexasiti Jesús pejwuajan. Samata, ijapi naewuajande chiekal jummatajibaliajwa, japi kaes chiekal Dios xanaboejalijwa!

13 Kaen aton chalechkal matabiis-eljame naksiya wut, Espiritu Santo kajachawaech xot, ijapon aton Dios nej kawuajne' kajachawaesliajwas naksiyapox pajut chiekal jummatabijsliajwa japajamechan jum-aechpoxan! Do jawut, japon aton chiekal chanaekabuanaxael asew jiw japajamechan jum-aechpoxan. **14** Xan Dios kawuajna x wut matabiis-eniljemetat, xan japajame naksiyax wut, naksiyax Espiritu Santo nakajachawaesaxtat. Pe xan jummatabiis-eniljemetat Dios kawuajna x wut, xan tajut jummatabijsaxinilbej. **15** Ja-an wut, ¿machiyaxaelenkat xan? Xan tamachan wut, matabiis-eniljemetat Dios kawuajna xaelen Espiritu Santo pijaxtat. Pe xan asew jiwxotx wut, Dios

kawuajnaaxaelen tajjemetat puexa jiw chiekal jummatajibijaliajwa. Jachiyaxaelenbej, xan jajuiyaxaelen wut. Tamachan wut, jajui jajuiyaxaelen matabijs-eniljemetat. Pelax asew jiwxotx wut, jajuiyaxaelen tajjemetat puexa jiw chiekal najummatajibijaliajwa. **16** Xamal Espiritu Santo kajachawaet wut, matabija-emiljemetat Dios gracias-am wut, ja-am wut, asan aton, jelnaexasitpon Jesús pejwuajan, japon xamal jumtaen wut, jummatabijisaxilon japox. Samata, japon kaenejchaxoelaxil, xamal suapich, Dios kawuajnam wut. **17** Xamal matabija-emiljemetat Dios kawuajnam wut, gracias-am wut, japox chiekal pachaem Diosliajwa. Pe asew jiw japajame jummatabija-el wut, ja-aech wut, japi jiw kaes chiekal Dios xanaboejaxili, jummatabija-el xoti, Dios kawuajnam wut. **18** Xan gracias-an Diosliajwa, kaes xabich naksiyax xot matabijs-eniljamechan. Me-ama puexa xamal, xan jachi-enil. **19** Pe naexasiti Jesús pejwuajan Dios pejjamechan jumtaeliajwa natameja wut, kaes pejme pachaemaxael naewuajnalijwan kaesuapich tajjemetat, naeweti chiekal xan najummatajibijaliajwa. Pelax pachaemaxil jiwliajwa, piach naewuajnaaxaelen wut jummatabija-eljemetat.

20 Takoew, xamal nabej nejchaxoele', me-ama yamxi nejchaxoel! ¡Pelax xamal babijaxanliajwa, me-ama yamxim wut, ja-amde! Xamal pakdiachwam xot, xchiekal nejchaxoelde! **21** Dios pejjamechan, chajia lelsprox, jum-aech Dios jum-aechprox: “Xan asamatkoi to'axaelen asajame naksiyapi, asatujnuchanpijiw, japi jiw xamal naewuajnalijwa. Pe xamal naexasisaximil tajjamechan, japi jiw xamal naewuajan wut” —aechox. **22** Aton chalechkal naksiya wut asajame, matabijs-eljame naksiyalijwa, Jesús pejwuajan naexasis-eli japox taen wut, pajut matabijaliajwapi Dios xajuprox japibej kajachawaesliajwas. Samata, japi jiw bej naexasisaxaelbejpi Jesús pejwuajan. Pelax kajachawaechpi Espiritu Santo, japi jiw naksiyalijwa Dios buxto'asproxan jiw naewuajnalijwapi, japox Jesús pejwuajan naexasitikal jumtaeliajwa. **23** Xamal natamejlamxot kaewutje puexa xamal chalechkal naksiyam wut asajamechan, matabija-emiljamechan, jawut, asan aton pat wut, Jesús pejwuajan naexasis-elpon, japon aton nejchaxoelaxael xamalliajwa: “Ampi jiw na-acha” —chiyaxaelon, nejchaxoel wut xamalliajwa. **24** Xamal natamejlamxot Espiritu Santo kajachawaet wut jumchiliajwam Dios buxto'apoxan

jiw naewuajnalijawam, jawut, asan aton xamalxot pat wut naexasis-elpon Jesús pejwuajan, xamal jumtaen wut, japon aton pajut matabijsaxael pejbu'wuajanpox Diosliajwa, babijaxan is xoton. Xabich nejchaxoelaxaelbejpon babijaxan ispoxanliajwa. **25** Nejchaxoelaxaelbejpon: “Xan puexa nejchaxoelxproxa Dios matabijt” —chiyaxaelon, nejchaxoel wut. Do jawut, Dios kawuajan wut, brixtat nukaxaelon Dios sitaeliajwa. Jawut japon aton jumchiyaxael xamalliajwa: “Diachwuajnakolax Dios xamalxot” —chiyaxaelon.

Culto chiekal isaxaelpox Jesús pejwuajan naexasiti

26 Takoew, natamejlam wut Dios pejjamechan naewesliajwam, asew jiw xamalxot jajuiyaxael Diosliajwa. Asew naewuajnaaxael jiw. Asew jumchiyaxael Dios buxto'aspoxan jiw naewuajnalijwa, Espíritu Santo kajachawaech wut. Asew chalechkal naksiyaxael matabija-eljamechan, Espíritu Santo kajachawaech wut. Japi jum-aechpoxan, asew jiw chiekal chanaekabuanaxael jiw chiekal jummatabijaliajwa japox, Espíritu Santo kajachawaech wuti. Jasox jachiyaxaelam puexa Jesús pejwuajan naexasiti kaes pejme chiekal xanaboejalijwapi Dios. **27** Asew jiw xamalxot chalechkal naksiya wut matabija-eljamechan, Espíritu Santo kajachawaech wut, ja-aech wut, Dios tapaeis japi kolenje, o, tres atonbej, naksiyaliajwa japi matabija-eljamechan. Japi naksiya wut, kaenanula naksiyaxael. Japi jiw Dios tapae-esal kaewutje kamta naksiyaliajwa. Japi kaenanula naksiyapoxan buxtoet wut, do jawut, asan xamalxot chanaekabuanaxael puexa jaxot naeweti japajamechan chiekal jummatabijaliajwa. **28** Asew jiw xamalxot naksiyasia wut matabijs-eljame, jaxot aton ajil wut japon chiekal chanaekabuanaliajwa puexa jiw jummatabijaliajwa, ja-aech wut, kaes pachaem, japi jiw naksiya-elaliajwa matabijs-eljame. Ja-aech wut, japi kaenanula boejlach Dios kawuajnaaxael. **29** Asew jiw xamalxot jum-aech wut Dios buxto'aspoxan, japoxan japi jiw naewuajnalijwa, Dios tapaeis japi kolenje, o, tres aton wut, jumchiliajwa. Japi kaenanula jum-aech wut, asew chiekal naewesaxespi japi naksiyapoxan jummatabijaliajwa, diachwuajnakolax Dios buxto'aspox jum-aech wuti. Ja-el wut, japi pajut asbuan jumch jum-aechlappoxkal. **30** Jaxot kaen aton ek wut, jawut chalechkal japon Dios buxto'as wut

jumchiliajwa, ja-aech wut, matxoelanaksiyapon, boejach nukaxaelfuk asan aton Dios buxto'aspoX jumchiliajwa. **31** Ja-am wut, xamal kaenanula jiw naewuajande Dios buxto'apoxan, puexa jiw chiekal jummatatabijaliajwa! Ja-am wut, puexa naexasiti Jesús pejwujajan, japi nejchachaemla-xaelbej, jummatatabija wuti japoxan. **32** Xamalxot kaen aton jumchisia wut Dios buxto'aspoX, japon jumchiyaxilfuk japox. Asew jiw naksiyax buxtoet wut, do jawut, japon jumchiyaxael Dios buxto'aspoX. **33** Dios neXsasinka-el kamta kaewutje puexa jiw jumchiliajwa, natameja wut.

Samata, xamalbej natamejlam wut, me-ama asew jiw, naexasiti Jesús pejwujajan, kaewutje jumchi-el naksiyaxaelpox, xamalbej ja-amde! **34** Xamal natamejlam wut culto isliajwam, watho' boejach chalakaxael naewesliajwa naewuajanpoxan. Tapae-esal watho' naksiyaliajwa. Watho' kaenanula chiekal naexasisaxael pamal, Dios japox to'a xot. **35** Watho' kaes matabijasia wut cultotat naewetpoxanliajwa, jawut kamta watho' wujnachaemsaxilfuki pamal matabijasiapox. Pejbachanxot pat wut, japi watho' wujnachaemsaxael pamal. Puexa watho' jachiyaxael jumxan-elasamata cultotat.

36 Xamal matxoela tuadui-emil Dios pejjamechan asew jiw naewuajnalijwa. Xamalbej Dios pejjamechan naexasitam wut, xamal koewam Dios pejjamechan naexasitampiya-emil. Samata, xamal najutliajwa nejchaxoelde isaxaelampoxan Diosliajwa! **37** Asan aton xamalxot jum-aech wut: “Xanlap Dios pejprofetan, Dios nabuxto'aponan jiw naewuajnalijwan” —aech wuton, japon aton pajut chiekal matabijsaxael, xan lelXpox Dios nakito'a lelaliajwan japox. Asan atonbej jum-aech wut: “Espíritu Santo nakajachawaet asew jiw kajachawaesliajwan” —aech wuton, japonbej pajut chiekal matabijsaxael, xan lelXpox Dios nakito'a lelaliajwan. **38** Japon aton neXsasinka-el wut naexasisliajwa xan lelXpox, Dios nakito'apox, xamal japon aton nabej naexasis, japon aton naewuajan wut!

39 Takoew, neXsasinkde asew jiw naewuajnafulaliajwam xamal Dios buxto'apoxan! Nabej buxfiasbej, asew jiw Espíritu Santo kajachawaech wut, chalechkal matabijs-eljame naksiya wut! **40** Natamejlam wut culto isliajwam, ichiekal culto isde!

**Jesucristo tɔp wɔt, tres matkoi wɔt, Dios
mat-echpox pejme dukaliajwa**

15 Takoew, xan majt xamal naewɔajnaɔx Jesús peɔwɔajan Dios bɔ'weliajwa xamal. Samata, xamal japawɔajan naexasitam xot, chiekal duilam. Xan nejxasinkax japox nejcha-xoelaliajwam. **2** Japawɔajan chiekal naexasisfɔlaxaelam wɔt, Dios xamal bɔ'weyaxael babijaxan isampoxanliajwa. Naexasis-emil wɔt, Dios xamal bɔ'weyaxil.

3 Xamal naewɔajnaɔx, majt xan nanaewɔajanwɔajan, Jesús peɔwɔajan. Japawɔajan kaes pejme pachaem. Me-ama asawɔajan, jachi-el. Cristo tɔp cruztat babijaxan isaspoxan nakwemosliajwapon, me-ama Dios peɔjamechan, chajia lelspx, jɔm-aech japox jachiliajwa. **4** Cristo tɔp wɔt, jawɔx mɔaxwɔajtat ochpon. Do jawɔx, tres matkoi wɔt, Cristo mat-ech pejme dukaliajwa. Me-ama Dios peɔjamechan chajia jɔm-aech, ja-aechlisox. **5** Do jawɔx, Cristo natulaelt Pedroxot. Jawɔx pejme natulaelton doce apóstolesxot. **6** Do jawɔx, kaes quinientos wajkoew natamejaxot natulaelton. Asew japixot tɔp, padiachow xotlisi. Xabich asew japixot laelpfuk. **7** Do jawɔx, pejme Cristo natulaelt Santiagoxot. Jawɔx puexa apóstolesxot-bej pejme natulaelton.

8 Do baxael, taxdukaxtat xanxot natulaelton. Asew jiw matxoela taen japon. Do jawɔx, xabich pin-iamatkoian wɔt, xanbej taenx japon. Samata, xan, me-ama kaes pachaema-enil wɔt, ja-an, taxdukaxtat taenx xot Cristo. **9** Xan majt chakifolx jaelaliajwan naexasiti Jesús peɔwɔajan jeliajwan jiw jebatat. Samata, amwɔtjel xan nejchaxoelx: “Puexa apóstolesxot xan kaes pejme pachaema-enil. Me-ama puexa asew apóstoles pachaem Jesúsliajwa, xan jachi-enil” —an, nejchaxoelx wɔt. Samata, xan kaes pachaema-el apóstolliajwan. **10** Pe nakiowa, Dios nabeltaen xot, namakafit amwɔtjel xan apóstolliajwan. Xan xabich kaes nabistax Diosliajwa. Me-ama puexa asew apóstoles nabist wɔt Diosliajwa, xan jachi-enil. Samata, Dios nafa'a-el xanxot. Xan tajut tajaxtat is-enil Dios pijax bichax. Dios nabeltaen xot, nakajachawaet japabichax isfulaliajwan. **11** Xan naewɔajnaɔx xamal Jesús peɔwɔajan. Asew apóstolesbej xamal naewɔajan japawɔajan. Kaes pejme pachaempox xanliajwa, xamal naexasisliajwam Jesús peɔwɔajan, naewɔajnaɔxpx.

Asamatkoi Dios mat-eyaxaelpox tupi, pejme duilaliajwa naexasiti Jesús pejwujajan

12 Xamal naewujajna wut, jum-an: “Cristo tup wut, tres matkoi wut, Dios mat-echpon pejme dukaliajwa” —an xanal. ¿Ma-aech xotkat asew jiw xamalxot jum-aech: “Dios mat-eyaxil jiw tupi pejme duilaliajwa” —aechkati xamalliajwa? Jasox japi jiw jumchiyaxil. **13** Diachwujnakolax Dios mat-eyaxil wut tupi pejme duilaliajwa, Cristobej mat-esaxisal pejme dukaliajwa, tup wuton. **14** Cristo mat-es-esal wut pejme dukaliajwa, xanal naewujajnapox, japox pachaemaxil jiwliajwa. Ja-aech wutbej, xamal Dios xanaboejampox bu'weliajwa pachaemaxil xamalliajwa. **15** Cristo mat-es-esal wut pejme dukaliajwa, xanal jum-anpox Dios ispoxliajwa, japox diachwujnakolaxil. Dios mat-eyaxil wut tupi pejme duilaliajwa, Cristo tup wutbej, japon chiekal kaelel tuxaxael. Mat-esaxisalbejpon pejme dukaliajwa. **16** Dios mat-eyaxil wut tupi pejme duilaliajwa, ja-aech wut, Cristobej mat-esaxisal pejme dukaliajwa. **17** Ja-aech wut, xamal Dios xanaboejampox bu'weliajwa, japoxbej pachaemaxil xamalliajwa. Ja-aech wut, Dios xamal kastikaxael, babijaxan isfulam xot. **18** Ja-aech wutbej, chajia tupi, Cristo pejwujajan naexasiti, japipej napelsaxael Diosliajwa. **19** Xatis ampathatat laelpas wut, wujajnewesfulas Cristo nakchaxdusaxaelpox. Dios nakmat-eyaxil wut pejme duilaliajwas, ja-aech wut, puexa jiw xatisliajwa nakwuljumchiyaxael: “Ampi jiw xabich nabijaslap, wujajneweslap xoti jilpox” —chiyaxael jiw xatisliajwa. Samata, kaes pejme xatis nabijasaxaes. Me-ama puexa asew jiw nabijat wut, jachiyaxisal xatis.

20 Pe diachwujnakolax Cristo matxoela mat-ech pejme dukaliajwa. **21** Patuxax tuadut, kaen Adán, matxoelapijin, babijax is wut puexa jiw tupaliajwa. Kaen Cristo tup wut cruztat, Dios mat-ech pejme dukaliajwa. Samatabej, asamatkoi jiw, tupi, japi jiw Dios mat-eyaxaes pejme duilaliajwa. **22** Adán, wajwujajnapijin, tup xot, xatisbej, wuchakalpijwas, tuxaxaes. Xatis, Jesús pejwujajan naexasichpis, Cristo pejiws xot, Dios nakmat-eyaxael pejme duilaliajwas. Me-ama Cristo mat-echpon pejme dukaliajwa, jachiyaxaelbej Dios xatisliajwa, asamatkoi nakmat-eyaxael wut pejme duilaliajwas. **23** Dios markpox, matkoi, pat wut, jawut jiw tupi, japi naexasiti Jesús pejwujajan,

kaenanula mat-eyaxaes. Dios matxoela mat-et Cristo pejme dukaliajwa. Pejme japon pask wut ampathatasik, japamatkoi puexa jiw, naexasiti Jesús pejuwajan, mat-eyaxaesbej pejme duilaliajwa. **24-25** Do jawut, Cristo chiekal toesaxael padaelma-jiw. Kaen namanaxil, japi asew jiw tato'alpi. Do jawutbej, Cristo naliaxsaxael potuajnucha jiw tato'laliajwa. Do jawux, Cristo wiasaxael pax Diosxot jiw tato'alpox. **26** Jawux japon toesaxael patupax. Ja-aech wut, jiw kaes tupaxil. **27**Dios pejjamechan, chajia lelspos, jum-aech wut, jum-aechox: “Cristo asamatkoi tapaeyaxaes puexa jiw tato'laliajwa” —aechox. Pe nakiowa, Dios pejjamechan, chajia lelspos, jumchi-el: “Cristo puexa jiw tato'al wut, Diosbej tato'laxaelon” —chi-elox. **28** Cristo puexa tato'al wut, japamatkoi japon pajut natapaeyaxael pax Dios tato'laliajwas. Samata, Dios puexa tato'laxael.

29 Xan ampox lelaxaelen chiekal matabijaliajwam. Asew jiw xamalxot pejjiw wetups wut, bautisa-esalpi, japi, laelpi, kawujan bautisaliajwas pejjiw, tupiliajwa: “¡Xan nabautisam! Xan nabautisam wut, ¡bautisa-esalpon, tupon, japon Diosxotsepon, me-ama bautisas wut, jachiliajwapon jaxotse!” —aech pejjiw tupiliajwa. Jiw tup wut, asamatkoi mat-eyaxisal wut pejme duilaliajwa, ¿ma-aech xotkat japi kawujan bautisaliajwas pejjiwliajwa, japi tupiliajwa? **30** Ajil wut mat-eyax jiw pejme duilaliajwa, ¿ma-aech xotbejkat pomatkoicha xabich chachoel wut xanalliajwa, xanal nakiowa naewujnax Jesús pejuwajan? Ja-aech wut, japox xanalliajwa pachaemaxil, Dios xanal namat-eyaxil wut pejme duilaliajwan. **31** Takoew, diachwujnakolax pomatkoicha xanliajwa chachoel, asew jiw naboesia xot. Xan nejhachaemlax, xamal naexasitam xot wajpaklon Jesucristo pejuwajan. **32** Xan xabich nabijatax Éfeso paklowaxxot. Japapaklowaxpijwxot, asew jiw xan nanejwesla. Japi jiw xabich chachoel xanliajwa. Pejmachoef wut, ja-aechi xanliajwa. Xatis asamatkoi puexa chiekal tupaxaes. Mat-eyax ajil wut jiw pejme duilaliajwa, ja-aech wut, ¿achaxkat xatis kana-xaes Diosliajwa isaspojan? Mat-eyax ajilaxael wut jiw pejme duilaliajwa, ja-aech wut, kaes pachaemaxael isliajwas asew jiw jum-aechpoxan. Japi asbuan jumch jum-aech: “¡Xabich xae-yaxaes! ¡Xabich feyaxaesbej naksaxslija! Jasox isfulas wut, ¡nejhachaemlaxaes, mox pawujna xot tupaliajwas!” —aech asew jiw.

33 ¡Japi jiw, japox jum-aechpi, xamal nabej tapae' naekichachajbaliajwa! Xamal pachaemam wut, pe nejnachala, babejchow wut, ja-aech wut, xamalbej babejchowaxaelam. **34** ¡Xamalbej nabej nejliakle! ¡Kaes babijaxan nabej isbej! Asew jiw xamalxot, japi jiw matabija-el Dios. Xan japox jum-an xamal nadalaliajwa.

Machiyaxaespoxtupi, asamatkoi mat-eyaxaes wut pejme duilaliajwa

35 Kaen aton xamalxot wuajnachaemsaxael wut, bej jumchiyaxaelbejon: “¿Machiyaxaelkat jiw, tupi, mat-eyaxaes wut pejme duilaliajwa? Tupi mat-ias wut pejme duilaliajwa, ¿japi pejbuan makabuanchiyaxaelkat?” —bej chiyaxaelbej, japon aton wuajnachaemt wut. **36** Japon japox wuajnachaemsaxael wut, japon wuajnachaemptpox, nejliaklax wulxael. Jesfut muthtas wut, naboelt. Jesfubokt xoep satat. **37** Jesfut, o, asafutbej, muthtas wut, muthtas pafut. Naboelt pafut. Naboelt pafut. **38** Muthtasfut, japox naboelt wut, me-ama pafut, kabuanchi-el. Boelnakola, me-ama Dios nejxasink japafut naboelaliajwa. Nejmach-asafu boelnakola wut, me-ama majt pafut wut, jakabuanchi-el. **39** Ja-aechlap-is jiw pejbuan. Najupa-elbej, choef suapich, mia suapichbej, baxi suapichbej. **40** Xatis taenspoxan thatbaxotat, ampathatat taenspoxanbej, japoxan kaenanula chiekal najupa-el. Thatbaxotat pachaempoxan najupa-el, ampathatat xabich pachaempoxan suapich. **41** Ja-aechbej juimt matkoipijin, madoipijin suapich. Kaenanula chiekal najupa-itliaka-el. Puexa ithaejbej kaenanula chiekal najupa-itliaka-el.

42 Ja-aechbej jiw tupi, Dios mat-ias wut, japi pejme duilaliajwa. Jiw tup wut, muthas. Do japoxan jaxot kaweta xoepdik. Japi jiw Dios mat-ias wuti, pajelbuanaxaelpi pejme duilaliajwa. Pajelbuan wut, japi jiw kaes tuxaxil. Kaes japi pejbuan wexoepaxisalbejpi. **43** Patupan muthtas wut, muthtaspox pachaema-el. Mamnika-elbej pox. Samata, chinax kaen aton japox nejxasinka-el. Pelax Dios mat-esaxael pox pejme dukaliajwa xabich pachaemaxael. Mamnikaxaelbej pox. **44** Muthtaspox satat naman. Jaxot xoepbej pox. Pelax Dios mat-esaxael pox pejme dukaliajwa, japox athupijax wulxael. Xatis ampathatat laelpas wut, wajbuan chabualael pas. Pe asamatkoi duilaxaes kaenanula pajelbuan antat Diosxotse.

45 Dios pejjamechan, chajia lelsprox, jum-aech wut, jum-aechox: “Adán matxoela isas. Do jawut, dukafulon, Dios kajachawaech xot” —aechox. Do jawux, Adán tux wut, baxael, Cristo nalaelt, me-ama Adán, ja-aechon. Pe Cristo kaes pejme pachaem. Me-ama Adán, jachi-elon. Cristo tux xot xatisliajwa, Dios naktapaeyaxael duilaliajwas pomatkoicha Diosxotse. **46** Wajbu'an, me-ama ampathatpijiw pejbu'an wut, ja-aech. Pe asamatkoi, Dios nakmat-eyaxael wut pejme duilaliajwas, me-ama Diosxotse duilpi pejbu'an wut, jachiyaxael kaenanula wajbu'an. **47** Adán Dios matxoela isas asthumbatat ampathatpijinliajwa. Baxael, Jesús, wachakalpijin, japon fuloek athuxotsik. **48** Puexa xatis wajbu'an, me-ama Adán pejbu't wut, ja-aech, isasprox asthumbatat. Pe asamatkoi, Cristo pejwujajan naexasichpis, wajbu'an, me-ama Cristo pejbu't wut, jachiyaxael.

49 Amwutjel wajbu'an, me-ama Adán pejbu't wut, ja-aech. Asamatkoi wajbu'an, me-ama Cristo pejbu't wut, jachiyaxael.

50 Takoew, ampox lelaxaelen xamal chiekal matabijaliajwam. Jiw pejbu'an wutfuk ampathatat, japi jiw, japabu'an suapich, fulaeyaxilse Dios poboxe duilaliajwa jaxotse. Ampathatat jiw pejbu'an pomatkoichaliajwa-el. **51** Xan nejxasinkax xamal matabijaliajwam asew jiw matabija-elpox. Cristo pejme pasliajwa wut, puexa xatis tuxaxisal. Cristo pask wut, puexa xatis, tuxa-esalpisfuk, tuxi suapichbej, jawut Dios puexa wajbu'an nakwexaliaxaxael. **52** Taxdukatrompeta jiw thiataen wut, jawutbej tuxilis Dios mat-eyaxaes pejme duilaliajwa. Xatisbej, laelpaspisfuk, Dios nakwexaliaxaxael wajbu'an pajelbu'antat pomatkoicha duilaliajwas. **53** Xatis ampathatat tuxps wut, wajbu'an xoepaxael. Japoxan asthumba nadofaxael. Samata, Dios nakbu'xaliaxaxael kaes pejme pachaemaxaelbu'an, xoepaxilbu'an. **54** Dios nakwexaliaxa wut wajbu'an, ja-aech wut, pejme tuxaxisal, me-ama Dios pejjamechan, chajia lelsprox, jum-aech wut, jum-aechox: “Dios malechaxael patuxax. Samata, Dios japi jiw mat-ia wut pejme duilaliajwa, japi jiw pejme tuxaxil. **55** Patuxax kaes malechaxil jiwliajwa. Patuxax kaes mamnikaxilbej jiwliajwa” —aech Dios pejjamechan. **56** Jiw pejlewla tuxaliajwa, Dios kastikaxaes xoti babijaxan ispoxanliajwa. Dios japi jiw kastikaxael, naexasis-el xot Moisés chajia lelpox. **57** Xatis tuxps wut, napelsaxisal Diosliajwa. Wajpaklon Jesucristo

tup cruztat Dios nakbũ'weliajwa. Samata, xatis graciastis Diosliajwa.

58 Takoew, xamal nejxasinkaxpim, Diosliajwa nabistampoxan, japoxan napelsaxil xamalliajwa. Samata, ¡nabej kofe' Dios naexasitampox! ¡Dios chiekal xanaboejim xamal kajachawaesfulaliajwa! ¡Kaes pejme xabich nabisde japonliajwa!

Pablo kito'apox Corinto paklowaxpijiw ofrenda owaliajwa

16 Ma amwũtjel lelx xamal to'aliajwan plata owaliajwam, xato'aliajwam Jerusalén paklowaxpijiwliajwa, japi naexasiti Jesús pejwũajan. Me-ama xan kito'ax Galacia tũajnũpijiw ofrenda owaliajwa Jerusalén paklowaxpijiwliajwa, ¡xamalbej ja-amde! **2** Xamal kaedominkoful wũt, kanampi, kaesũapich diajnaaelam plata owaliajwam Jerusalén paklowaxpijiwliajwa. Asew jiw xamalxot, kaes kanapi, kaes plata owaxael ofrendaliajwa. Jachiyaxaelam ofrenda owax kitoesliajwam, xan pas-enil wũtfuk xamalxot. Xamal kitoetam wũt ofrenda owax, xamal kaes kito'axinil ofrenda owaliajwam Jerusalén paklowaxpijiwliajwa, xan patx wũt. **3** Xamalxot pa'ax wũt, poejiw, najut makanotampi, to'axaelen Jerusalén paklowax poxade japi plata xalaeliajwa. Xan carta lelaxaelen japi nawexalaeliajwa Jerusalén paklowaxpijiw poxade. Japi jaxot xapa'a wũt, japaplata chaxdut wũti, japox cartabej chaxdusaxaelpi. **4** Pachaem wũt, xan tajut japi bũflaeyaxaelen Jerusalén paklowax poxade.

Pablo nejchaxoelpox pejme taeliajwa Corinto paklowaxpijiw

5 Xan amxot chijian wũt, majt Macedonia tũajnũ poxaxaelen. Do jawũx, xamal Corinto paklowaxpijwam taeyaxaelen. **6** Xamalxotx wũt, piach bej nakdukaxaelenbej xamalxot. Ja-an wũt, iama chatoepaxaelenbej xamalxot. Do jawũx, xamal naka-jachawaesaxaelam, xan fũlaeliajwan wũt. **7** Patx wũt xamalxot, xan nejxasinka-enil kamta chijiyaliajwan xamalxot. Dios natapaei wũt, piach dukaxaelen xamalxot. **8** Amwũtfuk namana-xaelen Éfeso paklowaxxot. Pentecostésfiesta toep wũt, do jawũx, fũlaeyaxaelen Macedonia tũajnũ poxade. **9** Amwũtjelfuk amxot, Éfeso paklowaxxot, pachaem xan jiw naewũajnalialjwan Jesús pejwũajan. Samata, namanxfuk amxot. Jiw xabich nejxasink

naewesliajwa Jesús pejwɔajan. Pe nakiowa, asew jiw japixot xabich nejxasinka-el xan naewɔajnaxpox.

10 Timoteo pa'a wɔt xamalxotde, ;chiekal bɔ'kɔlim japon nejchachaemlialajwa! Timoteo chiekal nabist wajpaklon Jesúsliajwa. Me-ama xan chiekal nabistax wɔt, ja-aech Timoteo.

11 Samata, Timoteo xamalxot wɔt, chiekal sitaeyaxaelam. Japon kajachawaesaxaelam, fɔlaen wɔt xan nataeliajwa. Xan Timoteo wɔajnawetx, asew, naexasiti Jesús pejwɔajan sɔapich.

12 Xamal nawɔajnachaemtam Apolosliajwa. Xan xabich to'ax Apolos, asew sɔapich, japi naexasiti Jesús pejwɔajan, nakfɔlaeliajwapon xamal taeliajwa. Pe Apolos owchi-el. Asamatkoi fɔlaeyaxaelpon xamal taeliajwa.

Pablo xabich saludos xato'apox, carta lelux kitoesliajwa wɔt

13 ;Chiekal taem Satanás xamal naekichachajbasamata! ;Dios chiekal xanaboejimbej! ;Xamal chinax asaxliajwa nabej nejlewle'bej! **14** Isam wɔt pachaempoxan asew jiwliajwa, ;puexa japoxan isfɔlde, japi nejxasinkam xot!

15 Takoew, xamal matabijam Estéfanas, japon pejjiw sɔapich, matxoela naexasit Jesús pejwɔajan Acaya tɔajɔxot. Japibej xabich kajachawaet asew jiw, naexasiti Jesús pejwɔajan. **16** Xan nejxasinkax xamal chiekal naexasisliajwam, me-ama japi, ja-aechpi, xamal to'a wɔt. Asew jiwbej, japi sɔapich nabistpi, chiekal naexasisaxaelambej.

17 Xan nejchachaemlax, asew xamalxotpijiw pa'an wɔt. Japi pa'anpi, Estéfanas, Fortunato, Acaicobej. Xan japiliajwa nejchaxoelx: “Ampi jiw xan nakajachawaet xot, me-ama Corinto paklowaxpijiw nakajachawaet wɔt, ja-aechi xanliajwa” —an xamal Corinto paklowaxpijwamliajwa, nejchaxoelx wɔt. **18** Samata, japi jiw pat wɔt, xan xabich nejchachaemlax. Kaes pejme chiekal Dios xanaboejtaxbej. Japi xamal kajachawaet wɔt, kaes Dios chiekal xanaboejam. Xan ja-anbej. Samata, ;jasi jiw xamal chiekal sitaem!

19 Asia tɔajɔpijiw, naexasiti Jesús pejwɔajan, saludos xato'a xamalliajwa. Aquila, pijow sɔapich, japow pawɔl Prisca, asew jiwbej, Aquila pejbaxot natamejapi, xabich saludos xato'a xamalliajwa. Jasoxtat puexa japi jiw saludos xato'a xamalliajwa, kaen, wajpaklon Jesucristo, pejjiw xot. **20** Puexa naexasiti Jesús pejwɔajan, amxotpijiw, saludos xato'abej xamalliajwa. Me-ama

asew jiw, Jesucristo pejwɛajan naexasiti, nakaewa nasaluda wɛt, ¡ja-amdebej xamal!

21 Xan Pablo, amxot tajut lelɛ xamal saludaliajwan.

22 Jiw, nejweslapi wajpaklon Jesucristo, japi jiw Dios kastikaxaes. ¡Nej xabuata wajpaklon Jesús!

23 Xan wajpaklon Jesucristo kawɛajnax xamal chiekal kaja-chawaesliajwa. **24** Puexa xamal saludax, nejxasinkax xot xamal, xatis wajpaklon Jesucristo pejjiiws xot.